


西湖志

第二函
第八冊



西湖志卷之二十四

物產

明聖之瑞肇應金牛是知一物雖微莫不涵泳太
平承符德化其所格被者深也西湖山輝水媚品
彙滋繁洪惟

聖澤覃敷是以庶類咸若觀百昌之暢遂益徵太和之
翔洽已志物產

穀品

鮑家田稻
咸淳臨安志鮑家田在錢塘門外東山

衙之北有玉泉水灌溉吳越王相鮑君福賜田於

錢塘至今名焉

吳廉靜鮑家田詩搖旆家家酒扶犁處處村草深迷井口槿密擁籬

根綠水明秧本青山失燒痕多應忌蠶事畏客掩柴門

八卦田稻

西湖遊覽志宋耜田在天龍寺下中阜

規圓環以溝塍作八卦狀俗稱九宮八卦田至今

不紊

馬龍標西湖竹枝詞八卦田中學種秧

麥嶺麥

成化杭州府志大小二麥嶺舊多種麥

王墳豆

紫桃軒雜綴南屏山邵皇親墳左側有地

產蠶豆顆大而味鮮杭人呼爲王墳豆

汪懋麟酒舍詩酒舍

爭傳段七孃王墳小豆摘新嘗春
殘花事都無了別有幽芳出院牆

木品

九里松

武林舊事

九里松唐刺史袁仁敬守杭日

植松於左右各三行靈隱寺志唐九里松今將千

歲大者五六人抱虬枝偃蹇龍幹攫挈爲海內異

觀數年之間所存略盡山後桐村塢土穀祠有松

六株甚奇古好事者欲觀九里舊松於此訪之可

也

鄧林九里松詩松是山靈一手栽堯天長就棟

梁材龍髯怒起春風急似怪遊人喝道來夏言
九里松詩百盤雲磴入千峰飛蓋行穿夾道松長
晝風雷驚虎豹半空鱗甲舞蛟龍江濤夜合秋聲

壯湖雨春添黛色濃欲藉丹青圖直幹恨無韋偃
得相從王世貞九里松詩偃蓋垂髯一萬株鬱蔥
佳氣冠江湖長依漢地三天竺不數秦時五大夫
永夜濤聲遙自合高秋嶺色未全孤無勞白眼輕
人世雨後芝
苓好更鋤

南屏松

淨慈寺志

南屏臨湖一帶自長橋至太子

灣舊名南新路夾路多長松幾五里許蒼翠與袁
仁敬所栽九里相掩映間有枯菱明初寺僧夷簡
及諸好事者補植之

萬松嶺松

方輿勝覽

萬松嶺夾道栽松西湖志類

鈔萬松嶺多巨松在唐時已有之矣白樂天夜歸

詩云萬株松樹青山上十里沙隄明月中南宋時
密邇大內碧瓦紅簷鱗次櫛比今平爲大塗而松
亦無幾咸淳臨安志白公詩拂城松樹一千株指
萬松嶺言今多不存

國朝雍正八年總督

臣

李衛以茲嶺爲省城來脈所關

宜植蔭木且爲南北上下通衢亦資蔭暘因補種
萬株蒼翠夾道漸復舊觀

雲居寺桐

雲居寺志唐時寺內有桐一本白香山

有詩

白居易雲居寺孤桐詩一株青玉立千葉綠
雲委亭亭五丈餘高意猶未己山僧年九十

清淨老不死自云手種時一顆青桐子直從萌芽
拔高自毫末始四面無附枝中心有通理寄言立
身者孤直
當如此

楓木塢楓

咸淳臨安志 楓木塢舊多楓木故名

郭祥

正楓樹林詩一塢藏深林楓葉飄
蜀錦寄語別家人路遙霜霰凜

雙檜

靈隱寺志 雙檜峰上有雙檜望之如蓋

藥王樹

靈隱寺志 在靈隱山門外大三圍乃香樟

也有僧過之曰此藥王樹可治心疾

青林巖櫛

靈隱寺志 青林巖多櫛桂木葉常青凌

冬不凋故曰青林

斷橋柳

湖山勝槩段家橋萬柳如雲

白居易楊柳枝詞蘇州楊

柳任君誇更有錢塘勝館娃若解多情尋小小綠楊深處是蘇家葛天民湖上觀柳偶記龍泉先生勾春柳一絲之句感而有述詩斷槎無葉又無枝得似勾春柳一絲不是畫船棲泊處白鷗飛下立時多

柳洲柳

廣羣芳譜西湖北山有柳洲亭南渡後自

湧金至錢塘沿城五里隄岸徧插垂柳故名

貢性之湧

金門見柳詩湧金門外柳垂金三日不來成綠陰折取一枝入城去教人知道已春深

蘇隄柳

西湖遊覽志蘇公隄夾植花柳歲久弗治

成化己前楊孟瑛闢之列插萬柳頓復舊觀久之

柳敗而稀嘉靖十二年縣令王鈇令小罪可宥者

得雜植桃柳爲贖自是紅翠爛盈燦如錦帶矣王

西湖柳詩隄上千枝復萬枝春來誰不繫相思西湖多少堪栽樹却種柔條引別離吳廣賦得西湖新柳詩裊裊六橋春依依萬樹新似縈離別恨如待治遊人帶雨柔條怯含煙翠色勻笛聞心易折

眉畫夢難眞映水嬌歌扇飛花襍舞塵風光邁劉阮何必問桃津

三橋柳 西溪梵隱志西溪有三橋多植柳濃陰夾

道又金四姥橋下垂柳獨盛

湖田桑 環湖沿山之田民多種桑施肩吾春日錢塘雜興詩酒姥

溪頭桑裏裏錢塘郭外柳穆穆路逢鄰婦遙相問小小如今學養蠶

土檀香 上天竺山志土檀香乃樺樹根香極清遠

櫻櫚 武林舊事慈雲嶺滿山皆櫻櫚

無根藤 靈隱寺志往往被牆無根自茂

花品

孤山梅 萬曆杭州府志孤山故多梅爲林處士放

鶴之地今梅徑梅塢尙存剝落荒蘚者殆不下數

百年物也芸林詩話孤山梅花雖以和靖得名然

白樂天有憶杭州梅花詩則自唐時已賞鑒矣遂

昌雜錄孤山之陰一亭在高阜上曰歲寒繚亭皆

古梅西湖遊覽志至元間儒學提舉余謙既葺處

士之墓復植梅數百本於山構梅亭於其下

張鼎孤山

種梅序夫人標物異物借人靈古往而今自來風
光無盡景遷而人不改興會常新是知有補斯完
無虧不滿誰非造化轉水光山色於眼前繁彼人
功留雪月風花於本地維昔孤山逸老曾於瀛嶼
栽梅偃伏干枝淡蕩寒嵐之月峻嶒數樹留連野
水之烟自鶴去而人不還乃山空而種亦少庾嶺
之春久寂羅浮之夢不來雖走馬征輿關前隄之
景色柰暗香疎影幸此夜之清光是以同社諸君
子點綴冰花補苴玉樹種不移於海外勝已集於
山中灌巖隙而長玉龍紛披偃仰暑澗溜而棲白
鳳布置橫斜幽心扶瘦骨同妍冷趣值寒枝共遠
西洽橋畔重開元圃印清波六一泉邊載起瓊樓
邀皓月非惟借風霜之伴與岸花江柳鬪風光亦
將留山澤之矐台溪飲巖居生氣色倘高人扶筇

掃石正堪讀易說詩若韻士載酒飛觥亦足吟風
弄月使千古勝場不逾寂寞將六隄佳境盡入包
羅豈獨處士之功臣抑亦坡仙之勝友余薄游湖
上緬想孤踪策月下之驢爲問山中誰是主指雲
間之鶴來看亭畔幾枝花爰快述其良圖用同貽
於好事云爾白居易杭州梅花因敘舊遊寄蕭
協律詩三年閑悶在餘杭曾爲梅花醉幾場伍相
廟邊繁似雪孤山園裏麗如妝蹋隨遊騎心長惜
折贈佳人手亦香賞自初開直至落歡因小飲便
成狂薛劉相次埋新隴沈謝雙飛憶故鄉歌伴酒
徒零散盡唯慚頭白老蕭郎林逋山園小梅詩二
首眾芳搖落獨暄妍占盡風情向小園疎影橫斜
水清淺暗香浮動月黃昏霜禽欲下先偷眼粉蝶
如知合斷魂幸有微吟可相狎不須檀板共金樽
剪綃零碎點酥乾向背依稀畫亦難日薄縱甘春
至晚霜深應怯夜來寒澄鮮祇共鄰僧惜冷落猶
嫌俗客看憶着江南舊行路酒旗斜拂墮吟鞍周
紫芝次韻仲平陳郎中孤山見梅詩綠髮朱顏日

枯槁心向梅花自傾倒誰知更有少陵翁江上情
多被花惱三年家住孤山下玉樹瀕湖得春早山
高有月韻最勝水近無風香亦好淩霜我欲念花
寒對酒花應憐客老孤芳一別今幾時更恐山林
跡如掃十年清夢竟成空遺恨此生常草草醉挽
芳條欲問誰滿挹清尊酌碧昊又次韻陳郎中再
賦孤山梅詩南枝先回北枝槁玉山誰向花前倒
庾郎已老怕愁多何郎憐花爲誰惱今年冬溫得
雪遲西湖地勝著花早舊時處士作詩處籬落橫
枝爲誰好清霜點樹月滿枝白雪堆花門不掃麗
句能爲鐵石腸賴有廣平文獨老借令一笑有餘
妍能此新詩不須草歸尋手種桃李花痛剪繁枝
投有昊采南杰孤山觀梅詩費盡年年造化功精
神全在雪霜中一枝映帶聽前月消得逋仙作主
翁王冕素梅詩樹頭歷歷見明珠底用題詩問老
逋且買金陵秋露白小舟載月過西湖西湖湖上
水如天狂客長吟夜不眠騎鶴歸來清興好梅花
無影月娟娟斷雲流水孤山路看得春風幾樹花

騎鶴歸來城郭是月明簫管是誰家疎花冷蕊依
寒水瑪瑙坡前春獨回却憶去年風雪裏吹簫曾
棹酒船來月明曾過西湖路愛看橫枝當水斜試
問玉堂諸學士幾時清夢到山家明月滿天霜氣
重梅花風韻更清妍鶴飛不帶簫聲遠春過西冷
第二船一樹橫斜白玉條春風吹亂雪飄飄孤山
老却林和靖多載笙歌過六橋溪谷冰霜春到遲
老夫長夜祇吟詩憑誰說與中朝士此是江南第
一枝又咏紅梅詩昔醉西湖處士家酒旗吹上水
邊花東風蛺蝶迷清夢一樹珊瑚月影斜夏正探
孤山梅花詩種梅凡幾樹結屋可三間人老花長
好香清夢亦閒雪深門靜掩月冷鶴飛還瀛嶼人
間世神仙海上山李演問梅孤山調寄聲聲慢詞
輕鷺繡谷柔屐烟隄六年遺賞新續小舫重來惟
有寒沙鷗熟徘徊舊情易冷但溶溶翠波如縠愁
望遠任雲銷月老暮山自綠顰笑人生悲樂且聽
我樽前漁歌樵曲舊閣塵封長得樹陰如屋淒涼
五橋歸路載寒秀一枝疎玉翠袖薄晚無言空倚

修竹張翥孤山問梅調寄木蘭花慢詞愛西湖干
樹曾幾度爲攜尊向柳外停橈苔邊待鶴酒熟詩
溫瀛洲舊時月色悵荒涼惟有數枝存天上梨花
成夢江南桃葉移根如今憔悴客愁村難返暗香
魂甚歲晚春遲角寒笛曉雪暗雲昏登臨不堪寄
目但青山影影月紛紛再約與君同醉從他啄木
門敲

蟠桃梅

李仁山詞註蟠桃梅來自杭和靖詩句得

於孤山也

白璞李仁山檻中蟠桃梅調寄南鄉子詞前村瀟灑雪徑人回駕一檻誰移春

造化鬱鬱香浮月下青綾半護冰姿宛然臨水開時說與綠毛么鳳不妨倒挂斜枝

南山早梅

石湖梅譜錢塘湖上有一種開尤早余

嘗重陽日親折之

范成大九月十日南山見梅詩五斗留連首屢回來尋南澗灌

塵埃春風直恐淵明
去借與橫枝對鞠開

青蒂梅

四朝聞見錄

光堯親祀南郊因過易安齋

爲賦梅巖詩嘗問主僧云此梅喚作甚梅僧對曰
青蒂梅又問曰梅邊有藤喚作甚對曰萬歲藤

天竺梅

萬曆杭州府志西湖之梅邇來頗不甚多

惟九里松抵天竺路幾萬株俗稱梅園他處雖繁

皆莫踰此

葛天民憶竺澗梅詩根在巖邊結枝從
水際橫此花殊近道凡木欠修行密雪

籠幽片疎篁倚瘦莖那時香不淺憶我話無生毛
澤民浣溪沙詞并序初春泛舟時北山積雪盈尺
而水南梅盛開水北烟寒雪似梅水南梅鬪雪千
堆月明南北兩瑤臺雲近恰如天上坐魂清疑向

北邊來梅花
多處載春回

千葉梅

錢塘縣志梅花天竺爲最盛有千葉梅重

臺梅

西溪梅

蕭士瑋南歸日錄西溪十八里皆種梅趾

目所向無非梅者中有梅泉從地湧出作梅花瓣
若可拾掇釋眞一梅譜法華自方井以西石人嶺
下以東縱橫十餘里皆有梅其成林而情景足媚
人意人一見之卽拊掌懽呼稱賞者尤在嶽廟之
西法華亭之東與予所居龍歸塢南北村落之間

爲更盛其梅列爲三等爲老梅中梅嫩梅至今日
法華之成林可觀者皆已接之梅也自十年二十
年已上者斷其中腰取已接梅樹上嫩枝接其本
間掩以土裹以竹籜不一月而嫩枝生然須春時
發生之候其接木之人亦須少年有旺氣者若老
年衰殘人便少生意梅在三十年以上者便不堪

接接亦多不活土人稱未接梅爲野梅已接梅爲

家梅

馮夢禎西山看梅記武林梅花最盛者法華
山上下十里如雪馬德樹西溪探梅詩露浸

東湖一杯酒相送西溪幾回首中宵伐鼓出郊原
月在船頭烟在柳石橋竹墅舊往還夢魂先繞秦

亭山行迴百轉迎清旭鶯啼清早開人顏千樹萬
樹色皓皓高枝低枝盡蒼老如濤噴雪搖晴空如
龍蟠泥見鱗爪遊人多點壽陽妝輕裾十里吹暗
香粉蝶翩躚霜蕊舞滿山石髮俱清涼窮歷幽林
愁日落榻借青岑俯層閣浮生心賞人百不能得
一花下應須飲十日微醉溪灣月伴衾再起看花
聲瑟

永興寺綠萼梅

西溪百詠序永興寺萬曆初馮太

史開之手植綠萼梅春時盛開車馬絡繹釋大善

詩云斷尾螺池留勝蹟綠英梅閣集嘉賓

李日華永興寺

雙梅爲先師馮具區手植詩琳宮雙瓊樹手植華
陽仙譚唾綴珠點文情浮玉煙光白定僧起夢香
高士眠孤山根脉
在相爲保芳妍

萬松嶺蠟梅

咸淳臨安志此花有數種以檀心磬

口者爲佳蘇軾詩君不見萬松嶺上黃千葉玉蕊
檀心兩奇絕

馬腔山茶

咸淳臨安志東西馬腔山茶色品最盛

陳了齋有接花詩云花單可使十色黃可使紫今
觀馬腔栽接有一本而十色者

棲霞嶺桃花

咸淳臨安志棲霞嶺舊多桃花開時

爛然如霞故以名嶺其下爲桃溪

半道紅桃花

武林舊事北山關王廟舊路種桃號

半道紅

包山桃花

咸淳臨安志在城南有冷水峪多桃花

名桃花關門上舊有蒸霞二字西湖志類鈔冷水

峪夾山多桃花中有流水舊呼桃源遊人多集焉

胡仲參包山觀桃花詩因訪桃花到嶺根御林春色此平分千株未數栽唐觀一幅猶堪畫晉源仙在雲間無處覓人行風外有香聞笙簫隱隱宮城隔立盡黃昏更斷魂黃順之冷泉峪桃花詩石家步障久成塵移作包山一段春惆悵日斜原上路年年紅雨打行人

湖隄緋桃

西湖雜記望湖亭接斷橋一帶隄甚工

緞夾道種緋桃垂楊芙蓉山茶之屬二十餘種周紫

芝聞西湖梅盡桃花已有開者作詩二首不到西湖忽換年今朝欲拄杖頭錢催成柳色遽如許落盡梅花最可憐日日湖邊踏淺沙西湖久住已成家劉郎去後空腸斷憶著元都觀裏花高應冕湖隄看桃花詩雨餘還出郭難負看花期烟外鳥啼樹風前魚弄絲舟移春水急花落暮山遲醉路迷芳草桃源聞馬嘶劉子伯雨後湖隄看桃花詩山雲忽卷湖西雨春色遙分兩岸花香溼馬蹄芳草亂鳥棲煙樹夕陽斜一按照水含朝露幾樹臨風落暮霞多少遊人醉歌舞王孫何事隔天涯吳允嘉湖隄看桃花詩青油榜子木蘭橈夾岸桃花映水嬌愛殺多情雙蛺蝶飛來飛去段家橋

滿覺壠李花 萬曆杭州府志李花之多莫盛於西

天山滿覺壠花時一望如雪名類有清消紫粉鵝黃

紅李等種類

李流芳西湖臥遊冊跋從煙霞寺山門下眺林壑窈窕非復人境李花時

尤奇絕眞瓊林瑤島也快雪堂集余從
十八澗出徐村一路李花盛開如雪

天竺桂

咸淳臨安志木犀有黃紅白三色舊天竺

山多有之

蘇軾天竺山送桂花分贈元素詩月闕

落驚前夜蟾窟枝空記昔年破滅山僧憐耿介練
裘溪水鬪清妍願公採擷紉裳佩莫遣孤芳老澗
邊郭祥正香桂林詩根托山中地香分月裏秋遊
人莫攀折風散一巖幽張九成憶天竺桂詩湖上
北山天竺寺滿山桂子月中秋黃英六出非凡
種宵許天香過別州自注天竺種他州無本

滿覺壠桂

錢塘縣志桂一名木犀滿覺壠獨盛拔

萃岑嶺數條巖壑花時遊人雜沓其下

西溪桂

王穉登西溪寄彭欽之書西溪十八里皆

行山雲竹靄中衣袂盡綠桂樹大者兩人圍之不
盡樹下花覆地如黃金山中人縛帚掃花售市上
每石僅當脫粟之半耳

靈山野桂

靈隱寺志靈山多野桂無種而生

靈隱桂子

南部新書杭州靈隱山多桂樹僧曰月

中桂也至今中秋夜往往子墜

靈隱寺志載堂禪師曾聞寺屋上歷

天落有聲出視之其狀圓而長大如葶麻子殼有文
亦相類取奉具德和尚曰此月中桂子吾已見過
二次時有好事者索觀取四五枚去纔至揚州而
桂子已盡本草拾遺今江東諸處每至四五月晦
時多於衢路間得月桂子大於狸豆破之辛香古
老相傳是月中下也餘杭靈隱寺僧種得一株近

代詩人多所論述洞冥記云有遠飛雞朝往夕還常啣桂實歸於南土南土月路也故北方無之山桂猶堪爲藥

况月桂乎

天竺桂子

羣芳譜浙中山桂台州天竺最多子如

蓮實或二或三離離下垂天竺僧稱爲月桂其花

時常不絕枝頭葉底依稀數點亦異種也

本草綱目月桂

落子之說起於武后時相傳有竺僧云自天竺鷲嶺飛來故八月常有桂子落於天竺道經月桂謂之不時花皮日休天竺寺八月十五日夜桂子詩玉顆珊珊下月輪殿前拾得露華新至今不會天中事應是嫦娥擲與人陸龜蒙和襲美詩霜實常聞秋半夜天台天桂墮雲岑如何兩地無人種却是湘灘是桂林釋慈永代撰桂子詩并序上嗣統之六祀天聖紀號龍集丁卯秋七八兩月望

舒之夕寺殿堂左右天降靈實其繁如雨其大如
豆其圓如珠其色白者黃者黑文者時有帶殼者
殼味辛識者曰此月中桂子也州牧右諫議大夫
胡公則同太常博士秘閣校理陳公詒太常博士
孫公昱暨冠裳好事者皆封呈咸奇之舊俗所傳
月墜桂子惟天竺素有之唐天寶中寺前一子成
樹今月桂峰在焉刺史白公居易詩云宿因月桂
落醉爲海榴開注云天竺有月中桂子落靈隱多
海榴花又東城桂詩曰子墮本從天竺寺根盤今
在闔閩城又刺史盧公輔句云遠客偏求月桂子
老僧不誌石蓮華凡才士好以詩游勝槩者到茲
鮮不以月中桂子爲奇句焉子居是山興復廢寺
十有二載始此一見之耳因取之播種林下狹甸
而甲坼彌月而盈寸雖柔條未抽而綠葉可識信
東平庭際淮南小山因不可以同日而語明年春
移白猿峰下古同軒亭環亭而植凡二十有五株
仍改亭爲月桂亭作詩二章一章十二句一章八
句刻石是亭之側敢告後賢桂子詩云月桂生瑤

實千年會一時偏從天竺落祇恐月宮知出海光
輪滿當軒玉樹欹嬋娟含素影凌亂下空墀泉客
珠連泣秋荷露忽垂林
間僧共拾猶誦樂天詩

月輪山桂子

脞說張君房為錢塘令宿月輪山寺

僧報曰桂子下墀遽登墀望之紛紛如烟霧回旋
成穗散墜如牽牛子黃白相間咀之無味

招賢寺紫陽花

南部新書招賢寺僧植桂香紫可

愛郡守白公號紫陽花

白居易紫陽花詩并序招賢寺有山花一樹無人知

名色紫氣香芳麗可愛頗類仙物因以紫陽花名
之何年植向仙壇上早晚移栽到梵家雖在人間
人不識與君
名作紫陽花

孤山榴花

咸淳臨安志唐時孤山有石榴花靈隱

舊亦多海石榴樂天詩宿因月桂落醉爲海榴開

青箱雜記錢武肅王諱鏐至今吳越間謂石榴爲

金櫻白居易題孤山寺石榴花示謂僧衆詩山榴

花似結紅巾容艷新妍占斷春色相故關行道地

香塵擬觸坐禪人瞿曇弟子君知否恐是天魔女

化身

龍井素蘭

錢塘縣志老龍井產素蘭品絕一郡

法華山蓀

羣芳譜蘭花紫白者名蓀出法華山

龍山瑞香

西湖遊覽志餘瑞香有黃紫二種有紫

瓣而緣金者

蘇軾次韻曹子方龍山眞覺院瑞香花詩幽香結淺紫來自孤雲岑骨香

不自知色淺意殊深移栽青蓮宇遂冠薜蘿林
紉爲楚臣佩散落天女襟君持風霜節耳冷歌笑音
一逢蘭蕙質稍同鐵石心置酒要妍暖養花須晏
陰及此陰晴間恐致慳嗇霖彩雲知易散鷓鴣憂
先吟明朝便陳迹試着丹青臨又真覺院瑞香調
寄西江月詞公子眼花亂發老夫鼻觀先通領巾
飄下瑞香風驚醒謫仙春夢后土祠中玉蕊蓬萊
殿後鞞紅此花清絕更纖濃把酒何人心動又坐
客見和復次韻詞小院朱闌幾曲重城畫鼓三通
更看微月轉光風歸去香雲入夢翠袖爭浮大白
阜羅半插斜紅燈花零落酒花濃好語一時飛動
又再用前韻戲曹子方坐客云瑞香爲紫丁香遂
以此曲辨證之怪此花枝怨泣託君詩句名通憑
將草木記吳風繼取相如雲夢點筆袖沾醉墨傍
花面有慙紅知君却是
爲情濃怕見此花撩動

聚八仙花

說略聚八仙卽今八仙花西湖山中在

在有之

菩提寺杜鵑

咸淳臨安志錢塘門外菩提寺有此

花甚盛東坡有南漪堂杜鵑花詩今堂基存此花

所在山多有之

蘇軾南漪堂杜鵑花詩南漪杜鵑天下無披香殿上紅遷毬鶴林兵

火真一夢不歸

閔苑歸西湖

俞祠木香

西湖遊覽志孤山俞公祠內左有木香

一本引蔓雙栢高三丈餘枝條蒙密洒落滿庭花

時如迸玉垂珠雪色照耀輒香襲人間數百步眾

鳥鳴噪其上終日不去至花殘乃不復聞

靈隱紅辛夷
槎菴小乘辛夷花鮮紅似杜鵑俗稱

紅白蕎是也白樂天有靈隱寺紅辛夷戲酬光上

人詩云紫粉筆含尖火燄紅胭脂染小蓮花芳情

命鄉思知多少惱得山僧悔出家

天竺石巖
花木考與杜鵑花本一種石巖先敷葉

後着花其色丹
趙抃上天竺寺石巖花詩對植齊開古梵宮欲求精筆畫難工直將

春占三旬盛誰謂花無十日紅未羨山桃資客笑且陪庭柏作家風遍尋他處都無此寶殿前頭只

兩叢

開元寺牡丹
西湖遊覽志餘白樂天爲杭州刺史

令訪牡丹獨開元寺僧惠澄近自京師得之植於
庭時春景方深惠澄設油幕覆其上徐凝自富春
來未識樂天先題詩曰此花南地知難種慚愧僧
閒用意栽海鷲解憐頻睨遊蜂未識更徘徊虛
生芍藥徒勞妬羞殺玫瑰不敢開唯有數苞紅萼
露在含芳只待舍人來樂天到寺看花乃命凝同醉
而歸土人式貴之

四照亭牡丹 孤山四照亭之前疊石爲臺植牡丹
數百本悉彭城佳種花開如蒸霞爛錦遠近皆見

西清志 卷二十四 二
范浦芍藥 咸淳臨安志今艮山門外范浦多植此
花冠於諸色者有早緋玉白綴露等名又有千葉
白者土人尤貴之

靈鷲醯醢 山家清供一日過靈鷲訪僧蘋洲留午
粥甚香詢之乃醯醢花也

荷花 夢梁錄荷花紅白色千葉者西湖荷蕩邊風
送荷香馥然咸淳臨安志白公郡齋詩云遶郭荷
花三十里指西湖而言也錢塘縣志芙蕖西湖多
種之金房綠葉素株翠柯縈藻朱儀映川逸日王

穉登客越志湖中舊植藕花雲錦燦爛香氣十里

近惡其妨漁一時拔去刻石城闔著爲令雖釣徒

快心而湖色殊寂寂無可觀余意不若散水衡錢

於種花之家而留花娛人庶幾兩利

周紫芝湖上晚歸見荷花

二絕藕湖煙水欲沉沙已着芙蓉一兩花擬借短

蓑隨雨去共誰同把釣魚車穆穆煙柳誰家樹拍

拍西湖盡日風和靖宅邊山雨急蘇公隄上藕花

紅于石觀西湖荷花詩我昔扁舟泛湖去同望荷

花浩無數誰家畫舫倚紅妝笑聲迴入花深處笙

歌悽咽水雲寒花色似嫌脂粉浣夜深人靜月明

中方識荷花有真趣水天倒浸碧琉璃淨質芳姿

淡相顧亭亭翠蓋擁羣仙輕風微顫凌波步酒暈

潮紅淺渥唇膚如凝脂腰束素一捻香骨薄裁冰

半破芳心嬌泣露湖光花氣滿衣襟月落波寒浸

香霧快然人在藥珠宮便欲移家臨水住回首落
日低黃塵十年不到湖山路花開花落幾秋風湖
上青山自如故高啟西湖夏夜觀荷詩雨晴南浦
錦雲稠晚待湖平蕩漿遊狂客興多惟載酒小娃
歌遠不驚鷗半湖月色偏宜夜十里荷香已欲秋
爲愛前江好涼景滿身風露未同舟孫一元晚坐
湖上荷花盛開詩薄晚西湖上花開還自憐風回
香冉冉鷗泛葉田田雲色晴移水月明淨放船夜
涼興更好獨坐釣絲邊袁中道西湖看荷花寄客
詩十里清流洗客塵銷魂芳艷滿湖濱秋來亦自
堪行樂只恐荷花不待人王瀛湖中觀蓮詩聞來
湖上放扁舟爲愛芙蓉花正稠十里彩雲明霽景
一番香雨洗清秋路從麴院追遺迹家在耶溪憶
舊遊懶向迴塘聽野唱恐教牽動百年愁朱應鍾
西湖采蓮曲五月芙蓉浦花開勝若耶若將湖作
鏡應照妾如花玉腕搖輕楫紅蓮暗綠波花深欲
無路棹轉忽聞歌尹臺西湖采蓮曲湖上羅裙映
玉缸蘇隄楊柳拂船窗采蓮誤觸鴛鴦起飛向花

間還自雙二八吳娃學戲船冰綃輕鞋動如煙舍
情棹入荷花裏笑問橫塘若個邊田藝衡西湖采
蓮曲湖面團團寶鏡開兩峰高髻聳妝臺阿郎不
用頻看妾自有荷花照水來風翻桂楫浪如雨鴛
鴦雙飛翠蓋舞郎嗅芙蓉誇味甜誰知寸心獨自
苦范成大雨後遊西湖荷花盛開調寄滿江紅詞
柳外輕雷催幾陣雨絲風急雷雨過半川荷氣粉
融香泥弄蘂攀條春一笑從教水濺羅衣溼打涼
州簫鼓浪花中跳魚立山倒影雲千疊橫浩蕩舟
如葉有採菱清些桃根雙楫忘却天涯漂泊地尊
前不放閒愁入任碧笳十丈卷金波長鯨吸陳三
聘次石湖韻詞紺縠浮空山擁髻晚來風急吹驟
雨藕花千柄艷妝新泥窺鏡粉光猶有淚凌波羅
襪何曾溼訝漢宮朝罷玉皇歸凝情立尊前恨歌
三疊身外事輕如葉悵當年空擊誓江孤楫雲色
遠連平野盡夕陽偏傍疏林入看月明冷浸碧琉
璃君須吸朱彝尊西湖荷花調寄滿江紅詞郭外
垂楊直映到水仙祠屋愛十里花明鏡面岸沉沙

腹幾陣涼颺翻葉白連盤驟雨跳珠綠是誰儂一
道撥青蘋波紋蹙紅衣褪開還續碧筒卷擎相促
繞菱根荇帶冷香飛逐偏是風前蝴蝶住但
無人處鴛鴦浴孽生綃悔不學丹青描橫幅

雙蓮 雙蓮卽瑞蓮宋時產於北山今湖上亦多見

之

蘇軾沈諫議招遊湖不赴明日得雙蓮於北山
下詩二首湖上棠陰手自栽問公更得幾回來

水仙亦恐公歸去故遣雙蓮一夜開詔書行捧縷
金箋樂府應歌相府蓮莫忘今年花發處西湖西

畔北
山前

繡蓮 咸淳臨安志 聚景園後湖中者名繡蓮極貴

西湖遊覽志餘 繡蓮紅瓣而黃綠結實如飴

金蓮 靈隱寺志 生湖中重臺萬曆杭州府志名曰

地湧金蓮

韜光金蓮

名花譜西湖北山韜光菴有金蓮圓葉

小花浮生水面

顯教寺金蓮

西溪梵隱志顯教寺殿前爲金蓮池

其花色黃如金葉圓如小錢

瑞相院青蓮

咸淳臨安志西蓮瑞相院產青蓮花

茉莉

武林舊事六月士女登舟泛湖爲避暑之遊

茉莉爲最盛初出之時其價甚穹婦人簇帶多至

七插

西泠志 卷二十四
梔子 萬曆錢塘縣志花有北山之梔子

金燈 萬曆錢塘縣志花有北山金燈

藏春塢凌霄 羣芳譜西湖藏春塢門前有二古松

各有凌霄花絡其上詩僧清順常晝臥其下子瞻

爲郡一日屏騎從過之松風騷然順指落花覓句

子瞻爲作木蘭花詞

蘇軾凌霄花調寄減字木蘭花詞雙龍對起白甲蒼髯煙

雨裏疎影微香下有幽人晝夢長湖風清軟雙鵲飛來爭噪晚翠颭紅輕時下凌霄百尺英

山礬 百花藏譜生杭之西山三月開花細小而繁

香馥甚遠卽俗名七里香也種之易活

金鉢盂 靈隱寺舊志生湖中單瓣

白蘋 靈隱寺舊志生湖中色白香清卽萍藻所生

紅蓼 靈隱寺舊志生湖濱俗呼水紅

蘇隄芙蓉 咸淳臨安志東坡倅杭日有和述古中

和堂木芙蓉詩今蘇隄及岸湖多種秋日如霞錦

陳造四月望再遊西湖詩春光陸續委東流看到湖邊安石榴更與蘇隄鷗鷺約辨舟來賞牡丹秋自注俗目芙蓉爲秋牡丹湯煥六橋芙蓉詩柳疎荷晚湖波涼木芙蓉發延秋光澹煙斜日弄清影浴鳧飛鷺窺紅妝繁華喚醒鶯燕老歌舞夢斷蒹葭蒼何當擷取問漁父著我一葉楓林傍高觀國蘇隄芙蓉調寄菩薩蠻詞紅雲半壓秋波碧豔妝泛露嬌啼色佳夢入仙城風流石曼卿宮袍呼醉

醒休捲西風錦明日粉香殘六橋煙水寒陳逢辰
延祥觀拒霜調寄西江月詞綠綺紫絲步障紅鸞
彩鳳仙城誰將三十六陂春換得兩隄秋錦眼纈
醉迷朱碧筆花俊賞丹青斜陽展盡趙昌屏羞殺
舞鸞妝鏡張翥秋日湖上賞木芙蓉調寄南鄉子
詞秋色照波明夾岸芙蓉似錦城罨畫樓臺紅粉
面輕盈未許黃徐寫得成一舸載楊瓊共醉花前
玉笛聲猶記青鸞和月跨三生我是仙家石曼卿

城垣甘菊 產城堞上花小而色黃味甚香美今每

歲採備入貢

馬塍鞠 沈競菊譜臨安西馬塍園子每歲至重陽

謂之鬪花有八十餘種錢塘縣志西湖多市其種
黃者九十有三白者八十有二紫者三十粉紅者

二十有四稱異品者十有七近日土人或以菴蘭

接菊花之小者頓大又以各菊互接則白間黃黃

間紅尤參錯可愛

楊萬里經和寧門外賣花市見菊詩病眼仇觀一束書客舍葭

李菊一株看來看去兩相厭花意索寞却似無清曉肩輿過花市陶家全圖移在此千株萬株都不看一枝兩枝誰復貴平地拔起金浮屠瑞光千尺照虛碧乃是結成菊花墻蜜蜂作僧僧作蝶菊花障子更玲瓏生採翡翠鋪屏風金錢裝面密如積金錫滿地無人拾先生一見雙眼開故山三徑何獨懷君不見內前四時有花賣和寧門外花如海

觀音菊

百菊集譜天竺花是也

此非南天竺或呼爲落帚花亦非也

自五月開至九月花頭細小其色純紫枝葉如嫩

柳其幹之長與人等或呼爲觀音菊

史鑄觀音菊詩霞幢森列

引薰風高出疎籬紫滿叢翠葉
纖纖如細柳直宜插向淨瓶中

果品

樟亭櫻桃

咸淳臨安志唐時樟亭驛有雙櫻桃

白居易

易樟亭雙櫻樹詩南館西軒兩樹櫻春條長足
夏陰成素華朱實今雖盡碧葉風來別有情

七寶山櫻桃

西湖遊覽志七寶山舊有櫻桃園宋

時採含桃以獻太廟者

靈隱寺枇杷

靈隱寺志大殿下有枇杷樹花實異

他所咸淳臨安志白者爲上黃者次之無核者名

椒子枇杷

湖菱

咸淳臨安志初生嫩者名沙角硬者名餽飽

湖中生如栗樣者極鮮東坡望湖樓醉書五絕詩

云烏菱白芡不論錢

蘇軾申三省起請開湖六條狀西湖水淺菱葑壯猛雖盡

力開撩而人力不繼則隨手葑合與不開同竊見吳人種菱每歲之春芟除撈漉寸草不遺然後下種若將葑田變爲菱蕩永無菱草堙塞之患宋史蘇軾傳軾知杭州時募民種菱湖中葑不復生收其利以備修湖

湖芡

咸淳臨安志芡又名雞壅產西湖者尤勝然

不多也可篩爲粉萬曆錢塘縣志芡實湖產特佳

香軟而粒大於越新編芡大如拳有刺中圓實可

啖俗謂雞頭今出杭州西湖越絕無

周紫芝食芡有感詩雞頭

子熟得新嘗流落空嗟客異鄉紅線綠荷香裏夢十年燈火記錢塘

湖藕

西湖遊覽志藕出西湖者甘脆爽口匾眼者

尤佳其花有紅白二種白者香而結藕紅者艷而

結蓮瞿宗吉詩云畫閣東頭納晚涼紅蓮不及白

蓮香是也錢塘縣志藕出西湖者曰花下藕尤美

蓮房

萬曆杭州府志紅花者爲上白花者次之然

尤以江干鴻雁池及西湖所產爲最餘皆不及

石塢楊梅 咸淳臨安志 舊載楊梅石塢其地產楊

梅今在煙霞嶺瑞峰寺之側 施註蘇詩 杭州圖經

峰楊梅尤甚有紅白二種今杭人呼白者爲聖僧

梅西湖古蹟事實杭州楊梅塢內有一老嫗姓金

其家楊梅甚盛所謂金婆楊梅是也蘇軾參寥惠

楊梅詩新居未換一根椽只有楊梅不直錢莫共

金家鬪甘苦參

寥不是老婆禪

梵天寺楊梅 蘇軾詩 夢繞湖山却月廊白梅盧橘

覺猶香自注杭州梵天寺有月廊數百間寺中多

白楊梅盧橘

兩山楊梅 萬曆杭州府志 有早色晚色燠色喫色

數種早色色最紅味酸燻色色紫黑味甘美喫色

晚色俱紅紫半晚色味鬆甜北山多早南山多晚

燻色並有之可燻可晒可水可糖可蜜

周紫芝西湖摘楊梅

調寄阮郎歸詞西湖山下水潺潺滿山風雨寒枝頭紅日曉爛斑越梅催染丹連翠葉擁金盤玉池生乳泉此生三度試甘酸欲歸歸尚難

十八礶楊梅 萬曆杭州府志楊梅東墓嶺十八礶

亦盛俗呼楊梅礶

徐村楊梅

萬曆杭州府志徐村產多尤甘美

龍井楊梅

錢塘縣志龍井法華山產者爲天下冠

橘 橙 元淮蘇隄秋宴詩湖上秋來景色新芙蓉

綠橘間黃橙

大樹堂栗 靈隱寺志慧理祖師西天攜來種實小

而味美惟靈隱有數十本移他處則不生大樹堂
公一株最大乃慧理手植東晉時物也至今鬱茂

報國寺銀杏 成化杭州府志報國寺有銀杏樹其

苗實無心槎菴小乘銀杏俗名白果一名鴨腳子武

赫林山甚多此樹不華而實或云夜半一花卽斂楊

載錢塘懷古詩所謂萬年珠樹落秋霜蓋指此樹

也

蔬品

菌

咸淳臨安志多生山谷竹松間其大者淨白名

辨玉蕈最貴黑者名茅菌赤者名竹菰皆下品

松花菌

猶園西湖諸山中有松花菌色紅潔可愛

俗名胭脂蕈

竹蕈

上天竺山志生竹根上色白而甘無毒

靈山椒

靈隱寺舊志靈山舊產椒與川蜀無異今

無

靈隱寺志椒園種椒香勝他處

蘿蔔 成化杭州府志蘿蔔大而長者尺餘出錢塘

方家峪等山 咸淳臨安志一名蘆菰西溪爲勝

茨菇 靈隱寺志湖中出

莊回生西湖竹枝詞勸郎休戀鳳凰山須記茨菇淺

水灣手劈竹田森碧玉莫教紅淚灑成斑

菱白 萬曆錢塘縣志菱白本秋實惟西湖四時有

之菱田之直可十餘金利倍禾稼

錢惟善食菱白詩西風吹雨飽

秋菰卸却青衣見玉膚客裏嘗新成一笑不圖今日見西湖

湖蓴 萬曆錢塘縣志生西湖中春末夏初采有冰

鈴附葉下舊傳產湘湖不知湘湖人來此取去錢

塘縣志初生嫩而無葉名雉尾蓴又名馬蹄蓴葉

舒長名絲蓴至秋則無人采矣西湖遊覽志餘聞

之漁人云西湖第三橋近出蓴菜不下湘湖閱耕餘錄

蓴菜生松江華亭谷郡志載之甚詳吾家步兵所

為寄思於秋風者也然武林西湖亦有之袁中郎

狀其味之美云香粹滑柔畧如魚髓蟹脂而輕清

遠勝其品無得當者惟花中之蘭果之楊梅可以

作配余謂花中之蘭是矣果中楊梅豈堪敵蓴何

不以荔枝易之季流芳西湖卧遊冊三潭采蓴跋

辛亥四月在西湖值蓴菜方盛時時采擷作羹飽

啖有蓴菜歌大意謂西湖蓴菜自吾友數人而外

無能知其味者袁石公盛稱湘湖蓴美不知湘湖

無蓴皆從西湖采去又謂蓴非湘湖水浸不佳不

知蓴初摘時必經宿浸乃愈肥凡泉水湖水皆可

不必湘湖也然西湖蓴人竟無知之者園中人舟

縱橫皆蕭山賣菜翁也可與吾歌並存以發好事
者一笑季流芳蓴羹歌怪吾生長居江東不識江
東蓴菜美今年四月來西湖西湖蓴生滿湖水朝
朝暮暮來采蓴西湖城中無一人西湖蓴菜蕭山
賣千擔萬擔湘湖濱吾友數人偏好事時呼輕舸
致此味柔花嫩葉出水新小摘輕淹雜生氣微施
薑桂猶清真未下鹽豉已高貴吾家平頭解烹羹
間出新意殊可喜一朝能作千里羹頓使吾徒搖
食指琉璃盃成碧玉光五味紛錯生馨香出盤四
座已嘆息舉筯不敢爭先嘗淺斟細嚼意未足指
點杯盤戀餘馥但知脆滑利齒牙不覺清虛累口
腹血肉腥臊草木枯此味超然離品目京師黃芽
軟似酥家園燕筍白於玉差堪與汝爲執友菁根
杞苗皆臣僕君不見區區芋魁亦遭遇西湖蓴生
人不顧季鷹之後有吾徒此物千年免沈錮君爲
我飲我作歌得此十斗不足多世人耳食不貴近
更須遠挹湘湖波張鳴鶴西湖採蓴詩渚蓴香細
綠生春翠帶牽絲出水新漫憶秋風歸興早喜逢

令節薦羞頻自憐。藿食醯鹽味詎羨。豪門鼎俎陳
采擷不妨歸。棹晚桃花煙暖隔。魚津淩邱西湖採
蓴詩。花滿蘇隄柳滿煙。採蓴時值艷陽天。漫移短
棹尋漁隱。似逐佳人拾翠鈿。香蘊和羹舒雉尾。脂
疑細葉煮龍涎。浮山寄寓湖山隱。不向秋風怨未
還。徐桂西湖采蓴曲。乍嚼冰絲還冷齒。更飡玉液
會流涎。桃花飄盡楊花落。留得湖中景物鮮。虞淳
貞西湖采蓴曲。湖上風光兩處分。采蓴弄影自爲
羣。龍鬚冷滑龍膏紫。寒色侵衣染綠雲。沈明臣西
湖采蓴曲。西湖蓴菜勝東吳。三月春波綠滿湖。新
樣越羅裁窄袖。着來人說似羅敷。江鏤西湖采蓴
曲。雨過桃花漲滿湖。雉蓴風格最於酥。絲縈漢女
蒼霞佩。玉映鮫宮雪。泪珠張文穎。西湖采蓴曲。碧
蔭隨波凝似玉。瓊枝映水滑於酥。不妨采作眞人
供。一夜春風遍兩湖。張遂辰采蓴曲。湖南三月潭
水綠。邇年競歌采蓴曲。小舸單槩入曉煙。葉葉絲
絲袂連屬。浮波乍見色參差。柔露盈盈不滿掬。更
憐寒沁滑流匙。粉乳芳鞋敢輕觸。一從此品出人

間紫葷青菰盡臣僕清泉淡煮味有無肯使尋常
薑桂辱因來逐嗜諸少年遂鄙長筵膾如玉偶傳
勝事真可人安排未免嗟聊復雖高鹽豉說風流
詎忍清饈作題目我欲一笑賦老饕莫祇相矜奢
邊幅不道當時生彘
肩覆獰麗豪元不俗

藥品

黃皮朮

咸淳臨安志 錢塘雷峰塢有之

名勝志雷峰塢產黃

皮朮

貫眾

咸淳臨安志 生龍井口

茯苓

武林舊事 小麥嶺無垢寺偃松下有茯苓因

名泉爲茯苓泉

益母草 咸淳臨安志生龍井山谷亦名草天麻

石膏 太平寰宇記錢塘縣治亥地有石膏雨霽時

出藥用爲最

本草綱目錢塘山中雨後時自出今錢塘人鑿山取之甚多搗作齒藥貨

用浙人呼爲寒水石入藥最勝他處者咸淳臨安志軟者寒水石硬者石膏生南高峰塢山下

草品

金星草 咸淳臨安志生南高峰

芝 花史臨安許邁常採芝於西山武林舊事靈芝

寺錢王故苑以芝生其間捨以爲寺故名山居新

語余山居寶雲山上不時生芝上天竺山志有紫

紅黃三種皆木本七識云柄如漆者是暑雨時採
蒸熟數年不變

青芝

西湖遊覽志青芝塢嘗產青芝

葑

蘇軾乞開西湖狀西湖水涸草生漸成葑田熙

寧中臣通判本州則湖之葑合蓋十二三耳今十
六七年之間遂堙塞其半父老皆言十年以來水

淺葑橫如雲翳空倏忽便滿更二十年則無西湖

矣

蘇軾次韻林子中見寄詩卷却西湖千頃葑笑
看魚尾更莘莘施宿注公開西湖以葑積爲隄

以通南北今
蘇公隄是也

蘊藻蘋苳 西湖遊覽志餘湖中蘊藻蘋苳諸水草

牽風演漾彌蔓不絕土人取之以供魚食歲計亦

不下數百金也

周紫芝次韻關子東湖上雜書水苳詩舊聞春草滿池塘何事新題

苳葉黃寄語藕花從此去不須滿意着紅妝

蘆葦 周紫芝湖上種蘆詩小序湖亭之勝大似江

上但無蘆葦二月二十移植數千本

周紫芝種蘆詩大年着色

山前雨摩詰無聲句裏秋已是湖山無限好更栽蘆葦伴輕鷗

河水蘆花 西溪百咏序蒹葭里俗名河水一派沙

汀水瀨蘆花如雪

浪頭蘆

王考功集浪頭蘆湖中草名俗云此草多

則湖水大

王士祿西湖竹枝詞兒家住近傍湖邨歲歲門前驗水痕莫怪今年湖水闊春

來長遍

浪頭蘆

竹品

皇竹 五雲山雲栖寺夾道多竹寺內有大竹一竿

國朝康熙四十六年

聖祖仁皇帝南巡幸寺

賜名曰皇竹

雙竹

竹譜條篁嫩篠對抽並引王子敬謂之扶竹

武林山西雙竹院中產靈隱寺志天親竹卽雙竹

也

趙抃題杭州雙竹寺詩粉籜雙雙脫修篁兩兩高同心齊管鮑並節漢蕭曹寒歲霜威禦炎天

暑氣逃此君真可

異吟遠不知勞

方竹 格古要論方竹出西蜀浙江杭州西湖飛來

峰山下亦有之

木竹 釋贊寧筍譜今靈隱山出筍堅可食今人採

竹作杖可愛或與籜同類耳

新婦竹 事物紺珠出武林山陰釋贊寧筍譜其竹

圓直韌可爲筏筍則三月而生可食

鶴膝竹

咸淳臨安志出靈隱山節密而內實略如

天壇藤間有突起者故名靈隱寺志竹出靈山一

名唐公竹又名鶴膝竹曲突如鶴膝狀

石面竹

靈隱寺志鷲山多有之

石竹

咸淳臨安志林和靖有石竹二叢詩云深枝

苒苒裝溪翠碎片英英翦海霞

金竹

西溪梵隱志金竹嶺滿山之竹皆作黃金綠

玉之色

剛竹

釋真一筍譜可以爲筐籃法華土民之貧者

乃用之以度生

壽星院竹

東坡志林湖上壽星院竹極偉

風篁嶺竹

西湖志類鈔風篁嶺蒼筤篠簜風韻淒

清至此林壑深沉迥出塵表嶺故叢薄荒密二元豐

中僧辨才淬治潔楚名曰風篁

冬筍

萬曆杭州府志冬筍俗名潭筍味更美杭州

筍四時皆有其美甲於諸蔬

早筍

咸淳臨安志哺雞筍出稍早和靖詩煙崖早

筍肥

晚筓 咸淳臨安志出楊墳

扶竹筍 釋贊寧筍譜扶竹今武林山西舊謂雙竹

院中所產相傳云自永泰以來有之馮翊嚴諸爲
之記王子敬竹譜云會稽箭竹錢塘扶竹蓋此雙
竹卽扶竹也是竹爲筍便有合歡貌

紫桂筍 釋贊寧筍譜或問筍有五色章采否對曰

江東黃筓間居賦有青筍閑中賦有素筍赤筍錢
塘多紫桂筍自餘斑狸縹緗不可勝言

鶯筍 釋贊寧筍譜錢塘多生其色紫苞當鶯至時

生故俗謂鷺筍

法華山筍

錢塘縣志法華山筍最盛有烏哺雞白

哺雞之名釋真一筍譜江南吳越皆多筍然未有

過於武林法華山其品爲最高也

豬蹄紅

釋真一筍譜冬月卽生理頭土中以鋤掘

之可三寸許其味極鮮甲於他筍未出土名豬蹄
紅長尺許其籜元又名元筍又名蚤筍蓋冠諸筍
而先出者

鮮芽

釋真一筍譜係晚筍在三月間盛時生其籜

間光潤而紫元狀類鰻魚不假鋤壅卑溼之處愈生

鷺鷥青

釋真一筍譜三月間生諸筍皆清瘦是筍

更瘦而色稍青其味清新而有澹趣

尖頭青

釋真一筍譜最晚出諸筍寥落此筍方翠

筍無有不尖此筍更尖如削其味鮮

毛筍

咸淳臨安志一名貓頭大者一莖重數斤釋

真一筍譜爲諸筍之王其籜有毛故名俗呼爲貓筍者非也大者重幾二十餘斤猶未出土肉白如

霜墮地卽粉碎以指搯之其軟嫩如腐嗅之作蘭花香

邊筍

夢梁錄筍有數名有邊筍釋真一筍譜卽毛

筍之旁出者方筍盛時生氣上升筍皆豎生氣旣衰根卽橫生盡其力可橫亙十餘丈至地之邊際與竹之長短相稱謂之竹邊故名邊筍又其狀類鞭亦名鞭筍地肥者軟嫩長尺許其籜紫色而兼白其味恬淡而鮮其氣醅而有蘊藉不類毛筍之精英盡發洩於外也

雷山筍紅筍 釋真一筍譜雷山筍紅筍皆於春時

鬪妍春至則彙生春去則絕響

苦筍 山家清供竹有苦竹出筍味亦苦釋真一筍

譜法華舊無苦筍余倡植之就其竹爲籬間亦取

筍食之煮苦筍與煮苦菜同法投之沸湯以武火

煮少頃取起以清水入磁缸漂之頻換水半日可

食不用鹽浸以刀切寸段啗之初入口尙有微苦

後苦氣漸轉覺舌本清涼爲恬淡爲無味之味非

俗士所可知也

剛竹筍 釋真一筍譜剛竹筍其味洌而苦與南都之筍同

羽屬

鶴 高士傳林逋結廬西湖之孤山嘗蓄二鶴或汎

小艇出遊客至則童子開籠縱鶴逋隨放棹而歸

鴉 四朝聞見錄紹興初高宗建行闕於鳳凰山山

中林木翳如鴉以千萬高宗在汴邸無山未嘗聞

此至則大駭命內臣張去爲領修內司諸兒聚彈

射而驅之臨平赤岸間蓋去闕有五六十里未幾

鴉復如初宮中亦習以爲常

百舌 咸淳臨安志和靖詩百種堪憐巧言語一般

惟欠好毛衣

杜鵑 杭州府志卽杜宇一名子規田家候其鳴則

興農事

周文璞壽星寺聞子規詩二首子規欲歸歸未得啼向錢王壽星石月明血盡人不

知只怪曉山深似碧莫向空山惱病僧暮雲臺殿異鄉人多時不識巴山路守着濃花啼過春周紫芝次韻關子東湖上雜書子規詩兩邊山木子規啼不管還鄉客夢稀應爲老翁推不去故將好語勸人歸李濤三月十六日西湖聞杜鵑詩纔上蘇隄聞杜鵑杜鵑怪我在天邊平生不作功名想今日胡爲富貴牽辟穀未能那廢日買山所欲尙無錢但須兩事略如意便占白雲深處眠吳錫疇湖

上聞鶉詩湧金門外買湖船綠樹陰陰叫
杜鵑恰莫叫從城裏去有誰人肯賦歸田

提壺

咸淳臨安志和靖過下湖別墅詩多謝提壺

烏留人到落暉

鷓鴣

萬曆杭州府志鷓鴣其鳴曰鉤輅林逋詩所

謂雲木叫鉤輅

鷓鴣

咸淳臨安志和靖春日卽事詩鴛鴦如綺杜

蘅肥鷓鴣夷猶翠湫微

松鼠竹雞

林逋湖山小隱詩晝巖松鼠靜春塹竹

雞深

獸屬

馬

〔夢梁錄〕吳越王牧馬於錢塘門外東西馬塍其

馬蕃息號爲馬海

鹿

〔和靖集注〕所養鹿名呦呦

〔林逋呦呦詩〕深林撼撼分行響淺葑茸茸

疊浪痕春雪滿山人起晚數聲低叫喚籬門

猿

〔李紳詩序〕杭州天竺靈隱二寺寺多猿狖謂之

孫團彌長其類釋遵式白猿峰詩序西天僧慧理

蓄白猿於靈隱寺陸羽記

〔徐集孫〕下竺看猿詩渴泉飲罷過別枝株守山

林得便宜伸手攫拏野僧果貴游玩弄如兒嬉膏粱恣欲甚邱壑苞苴贖把實囊橐本然無物拋乞

四清志 卷二十四
蟲屬

與縱有腥羶醫無藥勸汝儔侶只依僧殘齋臙核
亦潔澄切勿自照具人面便爾忘却當初洞口呼
不鷹張昱冷泉亭觀猿詩舊從巫峽看猿挂此日
山中復見之點與樵蘇爭墮果捷於風雨下高枝
月沉夜澗魂先斷風攬霜空叫轉悲應記往年梅
嶺事玉環付與老僧知黃玠冷泉亭呼猿詩俯石
瞰寒泉飲之不盈升照影忽自笑相看面如冰搖
搖松樹枝山猿呼欲鷹漸老筋骨疲愛爾解飛騰

蝙蝠

咸淳臨安志蝙蝠洞多蝙蝠因以名之西湖

遊覽志蝙蝠洞內產蝙蝠大者如鴉亦有純白者
其糞卽夜明沙

蜥蜴

靈隱寺志北高峰澗中有蜥蜴長二寸黑色

腹有紅點四足五爪

蟋蟀

宋史賈似道傳似道不事朝政於半閑堂日

據地鬪蟋蟀

敏求記似道撰促織經一卷促織經其名色有白牙青拖肚黃紅頭紫狗

蠅黃錦囊衣肉鋤頭金束帶齊膂翅梅花翅琵琶翅青金翅紫金翅烏頭金翅油昏燈三段錦紅鈴月額頭香色膈鈴之類甚多蟲之色白不如黑黑不如赤赤不如青其形以頭項肥腿腳長身背闊者爲上頭尖項緊腳瘦腿蕩者爲下蟲病有四一仰頭二捲鬚三練牙四踢腿若犯其一皆不可用

鱗屬

金魚

夢梁錄金魚有銀白玳瑁等色錢塘門外多

蓄養之入城貨賣名魚兒活

西湖遊覽志餘吳山大井中有金魚數十

頭父老云已一二百年自來無施食者兼以寒泉
陰竇仰蔽天日而久不斃殆神物也宣德間大
旱井涸人有取食者肉堅韌若麻筋然鄴侯井中
亦有五色魚其源通西湖故孳乳日夥又與吳山
井不同也

玉泉魚

〔武林舊事〕玉泉泉色清澈蓄大金色魚西

湖遊覽志玉泉淨空院有池畝許清澈可鑑蓄五

色魚數十頭遊泳如畫

徐集孫玉泉觀金魚詩石沼鑿瓊瑤金鱗數百條年

深須變化泉潔自逍遙網罟難垂手公卿擬上腰
龍宮依梵法翻水雨青霄朱彝尊杭州玉泉寺池
中五色魚凡千頭內一種翠藍者最可愛賦之調
寄玉人歌詞輕漣白愛一種嫩隔暈藍拖碧練塘
風煖蒼玉恣拋擲丹砂泉淺游朱鬣受盡人憐惜
又爭如雨過天青者般顏色濠上未歸客投香飯

青精日斜與食蓮葉東西何事便深匿翠鱗六
六空搖尾嬾遞間消息但年年映取柳陰千尺

南屏金鯽
冷齋夜話東坡詩我識南屏金鯽魚西

湖南屏山興教寺池有鯽十餘尾金色道人齋餘

爭倚檻投餅餌爲戲

東坡志林舊讀子美六和寺詩云沿橋待金鯽竟日獨遲

留初不喻此語及俸錢塘乃知寺後池中有此魚
如金色昨日復遊池上投餅餌久之乃略出不食
復入不可復見自子美作詩至今四十餘年已有
遲留之語則此魚自珍貴蓋久矣苟非難進易退
而不妄食安得如此壽耶程史今中都有秦魚者
能變魚以金色鯽爲上鯉次之貴游多鑿石爲池
寘之簷牖以供玩問其術秘不肯言或云以闌市
滂渠水之小紅蟲飼凡魚百日皆然初白如銀次
漸黃久則金矣未暇驗其信否也又別有雪質而
黑章的皜若漆曰玳瑁魚文采尤可觀惟杭人能

西湖志 卷二十四
之餌蓄

湖鱒

萬曆杭州府志 鱒池河江海亦皆有之然以

湖生者爲美若出西湖之裏湖者更佳 咸淳臨安

志 西湖產者骨軟肉鬆

湖魚

萬曆杭州府志 湖魚爲鱒爲鱣卽鱖之屬然

湖生者不甚大而美爲肉鯪爲鱖爲鱣 西湖遊覽志

餘湖中多雜魚而獨無鱖蓋地氣絕產者宋諺云

南柴北米東菜西水今改西魚者蓋城中之水不

藉西湖而魚產之富歲歲不減也

張文宿西湖打魚歌 湖中雨深

水滿隄錦鯉潑潑銀鯽肥老漁爭捕識水性隨波
撒網船如飛儂家有船亦有網身拙不慣腳爲漿
眼見他人得甚多日暮歸來但空掌鄰姬送酒新
落槽老妻捲袖操霜刀豈知篋內無一得清燈夜
共何寥寥朝來水長船競出纓罟箴箴益繁密魴
鮎未寸亦不遺我縱得之何忍食廚中老妻且莫
嗟湖水一退唯蒹葭魚兮魚兮善自育老漁之心無饜足

魚羹

武林舊事 淳熙間壽皇以天下養每奉德壽

士三殿遊幸湖山小舟時有宣喚賜予如宋五嫂魚

羹嘗經御賞

江鱠

咸淳臨安志 六和塔江邊生者極鮮腴

湖鰻

萬曆杭州府志 鰻魚湖中有之然不如江生

之多每秋風大作其至如陣市者滿道但其味則以湖中者爲佳錢塘縣志善市者取之於江蓄之於湖則脊黑而肥美

土步

靈隱寺志似河豚而小其味甚美產於西湖

萬曆杭州府志土鰲俗名吐哺以清明前者爲佳

邵斯貞西湖竹枝詞未到清明土鰲肥寺前新釀白薔薇沽得酒來魚正熟月到湖心蕩槳歸謹按土步魚演繁露作土部又作土附云此魚質沉常附土而行不似常魚浮水遊逝後人加魚去部則以爲鰲耳其以土步爲鰲魚恐未是也

介屬

湖鰕

咸淳臨安志蝦湖生者殼青

湖蟹

咸淳臨安志西湖舊多葑田產蟹土人呼湖

蟹和靖詩草泥行郭索又西湖晚歸詩云水痕秋

落蟹螯肥萬曆錢塘縣志生湖中者色青雄曰狼

螳雌曰博帶蟹略西湖蟹稱天下第一陸放翁詩

久厭羶葷愁下筯眼前湖上得雙螯宋史沈遵傳

巷長短纖悉必知禁西湖魚鼈故人居湖上蟹夜

入其籬間適有客會宿相與食之且詣府遵迎語

曰昨夜食蟹美乎客笑而謝之汪元量杭州雜和

林石田詩偶出西湖土新蒲綠未齊攜來編縮項

買得蟹團臍

無尾螺

淨慈寺志瀕湖居民將食螺已斷其尾濟

顛乞以放之遂活今西溪安樂山池中尙有無尾螺傳爲濟顛手放故物也

貨屬

湖醞

清波雜誌醞法言人人殊故色香味亦不等

溫厚清勁復繫人之嗜好秦州雪醕著名蓋用州

治客井蟹黃水紹興間有至都下用湖水釀成頗

不逮有詰之者云蟹黃水重西湖水輕嘗較以權

衡得之

蘇軾乞開西湖狀天下官酒之盛未有如杭者也歲課二十餘萬緡水泉之用仰給

於湖若湖漸淺狹水不應溝當勞人遠取山泉歲
不下二十萬工此西湖之不可廢者五也袁宏道
飲第六橋酒壚上詩流芳亭畔草如油墮粉吹香
歷幾秋鄂國有祠爭下馬西陵無主漫登樓玉甌
釀熟多酬直土哺魚肥易上鈎南
北諸峰收不盡朝朝放艇過溪頭

百花酒

神仙傳仙姥餘杭人嫁於西湖農家善採

百花釀酒後服化去

虎跑泉酒

錢塘縣志取虎跑泉釀者名虎跑泉酒

味極醇

珍珠泉酒

淨慈寺志珍珠園在雷峰之陰內有泉

迸出纍纍如貫珠官庫取以釀酒西湖志類鈔真

珠泉宋景祐中官家取以釀酒遂以為酒名

談蒼宋南

渡京醞有雪醅真珠泉皇都春有美堂中和堂皇華堂

荷花麴 名勝志 金沙澗其地產荷花宋南渡時取

以製麴釀酒因立麴院

周紫芝與張尚書論移麴院書戶部之有麴院其在

西湖閱六七年為麴六百餘萬斤官獲其利三十餘萬緡不為不多矣其為利可數而陳也議者乃欲徙而遷之不知其何苦而為是哉酒與麴須水而成水善則美水惡則散不可不擇也西湖之水清甘如飴歲取而未嘗或失今之所遷地瀕濁港用竹為筒以引河流不下百丈灌以江湖其味甚鹹人或以此難之則又欲鑿井取泉而不知泉脈之來是亦江湖而已前日議者謂某若謂水鹹不知龍山南外江漲北外當用何水某告以龍山用鴻雁池水南外用巡檢司大井水江漲用下湖

水北外亦用下湖水下湖者西湖之外流也議者無以爲對往歲京師麴院止用一井其味極苦人不能嘗然麴非此水不成其後徒置博士橋而麴屢壞乃復故處以此知水置之不可不擇也周文璞麴坊詩麴坊纔盡上湖船笑問雲山欠酒錢兩行柳絲黃不斷不知身去御園邊

寶雲茶

咸淳臨安志寶雲菴產者名寶雲茶

香林茶

咸淳臨安志下竺香林洞產者名香林茶

白雲茶

咸淳臨安志上竺白雲峰產者名白雲茶

東坡詩白雲峰下雨槍新

龍井茶

萬曆杭州府志老龍井其地產茶爲兩山

絕品錢塘縣志茶出龍井者作豆花香名龍井茶

色青味甘又翁家山亦產茶最下者法華山石人

塢茶而龍井法相僧收以語四方人曰本山快雪堂集

昨同徐茂吳至老龍井買茶小民十數家各出茶
茂吳以次點試皆以爲贗曰眞者甘而不冽稍冽
便爲諸山贗品得一二兩以爲眞物試之果甘香
若蘭而山人及寺僧反以茂吳爲非吾亦不能置
辨僞物亂眞如此劉瑛謝龍井僧寄茶詩春茗初
收穀雨前老僧分惠意殷虔也知顧渚無雙品煩
試吳山第一泉竹裏細烹清睡思風前小啜悟譚
禪相酬擬作長歌贈淺薄何能繼玉川王寅龍井
試茶詩昔嘗顧渚茗鑿得金沙泉舊游懷莫置幽
事復依然綠染龍波上香拏穀雨前況於山寺裏
藉此可談禪于若瀛龍井茶歌西湖之西開龍井
烟霞近接南峰嶺飛流密汨寫幽壑石磴紆曲片
雲冷拄杖尋源到上方松枝半落澄潭靜銅瓶試
取烹新茶濤起龍團沸穀芽中頂無須憂獸跡湖

山豈懼涸金沙漫道白芽雙井嘉世人品茶未嘗見但說天池與陽羨豈知新茗
煮新泉團黃分冽浮甌面二槍浪白附三篇一串應輸錢五萬

安樂山茶

西溪梵隱志安樂山春日焙茶石塢香

聞十里

湖水

六研齋筆記武林西湖水取貯五石大缸澄

淀六七日有風雨則覆晴則露使受日月星之氣
用以烹茶甘滑有味不遜慧麓以其溪谷奔注涵
浸凝滯非復一水取精多而味自足耳

絲

西湖人家多勤女紅春時皆以養蠶繅絲爲業

顧若璞湖上纈絲曲桃花花繁楊柳垂纖腰嫩臉
香風吹鶯兒調聲聲正滑堂上絲車鳴軋軋少年
騎馬挾金彈青鞵朱舩紛夾岸纈
絲終日不忍看寒蠶早晚啼秋幔

湖綿 萬曆錢塘縣志綿濯以西湖水者為東南最

程嘉燧湖南晚歸詩湖頭新水出新綿荷葉生時
又一年桑葦亂燒斜日裏百層山翠萬條烟張遂
辰雨晴湖畔詩積雨晴生桑柘烟人家早覺
翳鳴蟬燒香山下游船少新水涓涓正出綿

紙 快雪堂集宋人嘗造紙於玉泉六研齋筆記杭

州北山玉泉池水曾置局作紙甚佳

青石 萬曆杭州府志錢塘南高峰出青石土人採

之為金銀錫箔墩石極光膩又用為搗衣石志石

碑石石瓜之類

天竺石

舊唐書白居易傳居易在杭州得天竺石

一華亭鶴二蘇州得太湖石五折腰菱俱置於里

第池上

釋居簡石賦并序飛來天竺講徒聚石作供爲之賦石奇而怪兮有惜不惜石眠人

兮猶人

眠石夫二三子悠然會心攀高陟遐隱搜

細尋捫

蘿鳥輕箭雲景沈俯闕嶽嶽側行岑崆磅

礪巖阿

裴同礪陰洗濯雨蝕摩挲蘇侵獸駭始躡

鸞回欲

升介如其質鏘乎其音如考琮璜如憂球

琳如獲

大貝如致南金室邇兮其何能及石遠兮

輦無傭

直屹如林兮若拱而揖百夫睨兮無用其

力若夫

坡陀兮盤峭峙兮桓王佐才可就而不可

致權奇

兮巧玲瓏兮小市廓隱可致而不可馬俯

疎簷而

巍插挂綺疏而環植立中不倚凜姿淡如

却步欲

前偃僂及趨匪卑媠尊匪親簡疎匪璞貴

雕匪磨貴腴蔭之以線蕉密葉之涼友之以青琅
方寸之虛澤之以金莖沆漑之清鑄之以石鼓斷
缺之餘堅不可鑄頑不可澤與將爲魯叟之堅乎
抑爲瞽叟之頑乎或曰是石也皆有飛來之一體
始焉飛來終將飛去固蕩誕漫詒兮不可復據夜
半有力者負之而趨吾恐昧者不知兮防之不預
因作而言曰小子識之庶乎一得兮有補千慮姚
合天竺寺前立石詩補天殘片女媧拋撲落禪門
壓地拗霹靂劃深龍舊攫屈盤痕淺虎新抓苔粘
月眼風挑剔塵結雲頭雨磕敲秋至莫言長砭立
春來自薛蘿交薛章憲袖歸天竺石詩奔泉激
射下層顛汨沒泥沙不記年貢比鉛松思往聖
同薯蕷挾飛仙微皴頗訝龜紋拆稍瑩還疑
鵝卵圓袖裏攜歸呼石友銅盆貯水鬪精堅

瑪瑙石

咸淳臨安志瑪瑙坡地有碎石若瑪瑙西

湖遊覽志人多採之以鑄圖篆西溪百詠序瑪瑙

池底皆細石圓繡狀如瑪瑙

泥孩

江湖紀聞臨安風俗嬉遊湖上者相競買泥

孩鸞哥花湖船回家分送鄰里名曰湖上土宜白

懶髓迎春黃胖起於湧金門外地有杏花園游人

多取黃土戲捏爲人形爾

張遂辰春遊詩半山落日促歸塗手抱泥孩出

酒壚爭擁六橋垂柳
下一舟近岸百人呼

西湖志卷之二十四

總校王詒壽分校

王彥起
陳鈞校

西湖志卷之二十五

冢墓

冢人墓大夫之掌所以辨兆域也而有功居前不列爵等尊卑之次禮意可知己自有西湖以來若堂若金者凡幾要惟功德在人而後墓厲有守不然彼桓氏之槨豈真能與石不磨者耶志冢墓

孤山路

宋和靖處士林逋墓

夢梁錄林處士墓在孤山之

陰

詳名賢輟耕錄至元間釋氏豪橫各處陵寢發掘始盡獨孤山林處士墓惟遺一玉簪時有人

作詩以悼之曰生前不繫黃金帶身後空餘白玉簪葉森仁葺和靖先生墓堂記和靖先生墓在孤山宋紹興間建四聖延祥觀詔勿徙墓後葺祠宇金華王庭書和靖先生墓五字表墓道林泳爲記至元己卯江浙儒學提舉余謙德搗命森脩葺之復言於憲各捐俸助修始於是年四月廿三日成於五月十三日記以少牢名其軒曰鶴軒萬曆杭植梅數百木於山之上德搗命森書石焉

州府志成化十年郡守李端重修邑人于冕沈恆

於墓上重種梅百樹

高翥拜林和靖墓詩玉函香骨老雲根占斷孤山水月村

薦菊泉清涵竹影種梅地冷帶苔痕生前已是全名節身後誰從問子孫惟有年年寒食日遊人來與酌芳樽吳惟信拜和靖墓詩墳草年年一度青梅花無主自飄零定知魂在梅花上只有春風喚得醒方岳林和靖墓詩結廬舊與青山對修竹蕭疎半不存惟有亭前古梅在暗香疎影幾黃昏徐

集孫重拜和靖先生墓詩秋聲爾許悲懷古若爲
思菊老泉堪薦山孤草亦萎高風留塑鶴殘雨暗
荒碑依舊梅千樹無花香似詩黃宜山題和靖墓
詩墳邊疎影尙橫斜鶴老苔荒處士家獨立東風
難著語只攜尊酒酌梅花吳錫疇林和靖墓詩遺
稿曾無封禪文鶴歸何處認孤墳清波千載梅花
共說著梅花定說君林景熙謁和靖墓詩回首咸
平夢清風自滿湖乾坤一士隱身世此山孤鶴去
空秋影梅開尙舊株耳孫今白髮持酒酌寒蕪薩
天錫和靖墓詩先生勝隱得孤山小艇沿湖日往
還自愛煙霞居物外豈知名姓落人間鶴無過跡
苔痕老梅自開花月影閒表墓有銘祠有奠高風
千載起廉頑張昱過林和靖墓詩西湖處士林君
復幾首梅詩直到今此事豈容同末俗當時還亦
有知音高車大旆應何往剩水殘山尙可吟三尺
孤墳埋宿莽過君誰不願抽簪周鼎過和靖墓詩
一邱千古獨歸然幾樹梅花抱墓田結就巢居猶
昨日塑來鶴立自何年澹煙流水斜陽外芳草新

亭古岸邊欲去徘徊城
月上裏湖猶有未歸船

國朝雍正十年浙江糧儲道朱倫瀚重葺

朱倫瀚重修
林和靖先生

墓記得志行道勲業表於世聲名傳於後此有所
建立於天下者之所爲也無所建立矣而稱之在
當時傳之在後世非其人立身行己自有不可泯
滅者由是而傳之稱之固不在勲業之有所表著
也耶和靖處士生宋咸平景德間是時宋運方昌
人才輩出其以事功政績著者史不勝書而處士
放浪江湖卒歸老於西湖之孤山以終其身如處
士者豈眞無意於建樹耶何其生到隆之世而甘
以高蹈終也處士旣不用於世其爲處士之才與
識俱不可得而知跡其生平居西湖二十年不入
城市則其高風峻節有過人者矣至於識李諮於
未遇教其兄子策名於世則固未嘗無意於世者
俾處士而出其才與識有所作爲於天下事功政
績何遽不若人而處士卒不爲也則固自有所以

爲處士者在矣。余年弱冠過西湖，弔處士墓，尙及見老梅一本，傳爲處士手植。年來承乏監司，朝夕湖山之側，一抔黃土，較三十年前漸至塌毀，而所謂手植之梅已不可復覩。因捐俸葺其墓，樹表以識墓之前後，復增植梅花數十樹，嗟嗟千百年來人之言梅花遊孤山者，意中輒憬然有一處士在。不知此皆非處士也。墓之有無在處士固浮塵野馬視之，知此意者其殆可與言處士矣。因工竣之日，復握管而爲之記。雍正十年二月。

宋處士高翥墓

武林舊事：字菊澗，葬孤山後談家

山

明按察使副使柴祥墓

杭州府志在孤山

靈隱寺志祥號

醴泉天性篤孝，官御史直諫有聲。陳情終養二十年，鄉黨稱長者。

宋率府沈君墓

萬曆錢塘縣志在西城

曾鞏率府沈君墓誌

君姓沈氏始自吳興徙家錢塘君以宗室密州觀察使宗旦恩累遷太子右司禦率府副率兼監察御史階銀青光祿大夫勳武騎尉嘉祐二年卒葬錢塘之西城

明孝童郭金科墓

錢塘縣志在表貞祠右

明孝友傳孝童

名金科錢塘人天性至孝火焚其廬金科年十五已脫於火不見母遂慟哭入火救母竟焚死明晨出其屍灰燼中子母相抱不解御史聞之命葬之孤山表曰郭孝童墓

南山路

元孝子丁鶴年墓

杭州府志在學士港之南園

堯山

堂外紀鶴年同同人嘗十日葬其父霖雨不止鶴年仰天悲泣翼日雨止葬畢雨如初時兵亂後失

明 母墓所在悲慕深切夜夢母告以葬所鄰翁韓重者亦夢焉卽其地求而得之見母屍正中一齒如漆復嚙齒滴血試之良驗

宋 遂改耐父壙人呼丁孝子

明御史木訥墓

錢塘縣志在學士港口

明忠烈黃斌墓

萬曆錢塘縣志在學士港正統十

宋 四年征處州賊葉宗留以忠烈戰歿於陣

明大學士諡文端高儀墓

萬曆杭州府志在南屏

山萬歷二年諭葬

呂調陽大學士高公墓誌公字子象別號南字世籍錢塘舉進

士授編脩累陞禮部尚書乞休加太子少保歸逾年詔起於家日侍講於文華東序進文淵閣大學士計間命以一品禮祭葬諡文端徐林鴻謁高文端墓詩雷峯隱藉花莊湖水青蒼半夕陽墓下

疎花吹燕雀城邊畫角散牛羊兩湖雨露遲仙馭
三殿風雲隱御牀辛苦受遺高相國手攜丹詔出

光明

明禮部尙書諡文僖倪謙墓

錢塘縣志在新亭鄉

陳鎬倪公傳公字克讓錢塘人正統己未進士歷官南京禮部尙書贈太子太保敕葬

宋莊文太子墓

咸淳臨安志在寶林院

建炎以來朝野雜記

太子初名愉紹興十六年補右率府更名愔乾道元年八月立咸淳臨安志寶林院開寶六年建名總持治平三年改今額乾道三年充莊文太子攢所香火院

宋皇子齊王墓

咸淳臨安志在廣法院

明孝子孫宗徽墓

杭州府志在慶樂園

錢塘縣志宗徽字仲

文幼有至性六歲喪父卽知哀慕母楊鞠之相依
爲命及長益竭誠奉養母終廬墓側逮免喪猶日
榜一舟至墓所泣奠年踰八十日扶掖至母氏
旌節坊下稽首終身不忘其親成化間旌表

明布政使參議孫枝墓 杭州府志在南屏山之右

明昌化伯邵林墓 西湖遊覽志在九曜山 獻徵錄

邵公林暨夫人楊氏實維太皇太后之考妣也先是公與夫人俱早逝權厝於錢塘北山之青芝塢嘉靖乙亥詔守臣擇地於南山之麓而改葬焉賜諭祭建祠賜額曰發祥

明兵部員外郎陳學易墓 清朴祠記在九曜山 學易自撰

生曠誌學易以萬曆庚寅生太平里甲子領賢書庚辰就博士癸未五十四始徵南宮選旋移南駕部年六十有四癸巳冬歸自銘其墓之石銘曰疇日蓄而無終歲粟疇曰嗣迺能善養志疇匪孝生

事祭葬力獨効疇匪悌極難課藝諸昆季友周兮
幹蠱創守兮並苦踰壯薦鄉試半百方賜第理楚
刑僉曰平不用兵亂者寧因轉南獲既含飯寢爾
苦遽爾潛北山之北南山之南適其適而恬其恬
問之者謂榮有爵貴有壽見之者謂羣不黨矜不
爭猶然昔日之書生於乎今已矣俾後之人銘其
阡曰此窮措大
陳學易之墓門

國朝光祿寺卿龔佳引墓

錢塘縣志在青龍山

明長史瞿佑墓

杭州府志在甘溪

詳名賢

明府尹陳良器墓

萬曆杭州府志在甘溪

明太僕寺卿王榮墓

萬曆杭州府志在石屋嶺

分省

人物考王榮字希仁錢塘人永樂進士授全椒學
訓導陞淮府左長史至宣宗朝歷官吏部都給事

中陞太僕少卿景泰中進太僕寺卿四年致仕歸天才快敏立朝五十餘年聲實並著

明刑部主事王謙墓

在石屋塢

徐一夔王自牧墓誌錢塘卓行之士

王君自牧諱謙以洪武八年卒年五十七無子其友相與治葬於南山石屋塢先塋之次君文學行誼不愧古人會有詔求前代遺逸有司以君薦授中書遷刑部主事尋引退平生所爲文并詩自類爲家集亦好道家自號壺父著壺夫書一卷

明禮部主事陳鏞墓

在石屋嶺西

成化杭州

府志鏞字叔振錢塘人永樂乙未進士入翰林授禮部祠祭主事宣德三年征交南兵部尚書李慶贊軍務舉史安及鏞自輔二人屢進忠益驕恣不納至敗被執鏞顧安曰吾輩見危授命耳皆不屈死少師楊士奇表安墓敘兩人事甚悉鏞重厚清介表裏一由於正鄉邦稱之

明按察使馮覲墓 舊浙江通志在石屋嶺

明邵武同知諸燮墓 兩浙名賢錄在石屋嶺

宋皇子保寧軍節度使墓 咸淳臨安志六通慈德

院舊名惠德院治平二年改今額嘉泰四年充皇

子保寧軍節度使攢所

明高德暘墓 武林紀事在南山庶子鄒濟作銘

詳見

名賢

國朝處士柴紹炳墓 錢塘縣志在南山花家圩

宋景獻太子墓 武林舊事在法因院

咸淳臨安志法因院舊額

報慈大中祥符元年改今額嘉定十三年充景獻太子攢所

宋兩浙轉運使張鎡墓 咸淳臨安志在西湖佛手

山陸游誌其墓

舊浙江通志鎡秦之三陽人父宗元敷文閣待制鎡以恩任承事郎

歷兩浙轉運使委明州造船人或唁其非勲闕所宜鎡謝曰吾處之懼弗稱敢薄之耶訖代去不以卑冗怠事

明京兆尹沈光祚墓 舊浙江通志在翁家山天啟

間諭葬

明許瓢隱墓 成化杭州府志在大慈山

明廣西布政使參政朱鏞墓 在大慈山 張寧太中大夫廣西

布政司右參政朱公墓誌弘治元年參政朱公卒
公諱鏞字廷用號恒菴景泰丁丑進士授南京兵
部職方主事陞郎中出知廬州秩滿有廣西之
命以軍務行邊致仕歸壽六十七葬於大慈山

明知通州吳瓚墓

武林紀事在大慈山

詳名賢陳堯道武林

紀事後序武林紀事四冊自一卷至六卷則紀武
林事績後二卷則紀聞見事乃樂聞吳先生瓚稽
考諸書會萃成編者也先生年八十餘註書立言
手不釋卷真天地間之完人而吾輩之所當法者

明江西提學查允元墓

江西通志在虎跑大慈山

明禮部郎中張懋忠墓

舊浙江通志在白鶴峰孫

媳孝婦郭氏耐

明處士王必顯墓

錢塘縣志在白鶴峰

元臨淮縣尹蔣會隆墓

在玉岑山

程鑑夫臨淮縣尹蔣君墓誌濠

上蔣君會隆官淮東道儒學副提舉遷淮安路臨淮縣尹以大德乙己卒墓在錢塘縣玉岑山

明贈參政黃慶墓

錢塘縣志在南高峰玉岑山慶

有隱德稱爲長者

明處士吳博墓

杭州府志在玉岑山

舊浙江通志博嘉靖間布

衣宮詹太冲其曾孫也原籍海鹽母殷年十九遭家變襁負其子遷武林吳氏之籍武林由處士始

明學士王獻墓

杭州府志在玉岑山下成化二十

三年諭葬遣官營墓

王俱王學士墓誌公諱獻字惟仁仁和人景泰進士授編

修官至禮部左侍郎先

後握院章者十有六年

家墓一

宋成穆郭皇后攢宮

咸淳臨安志在錢湖門外修

吉寺

宋史后妃傳后開封祥符人奉直大夫直卿之女孫孝宗爲普安郡王時納焉封咸寧郡

夫人生光宗孝宗受禪追冊爲皇后諡恭懷尋改安穆及營阜陵又改成穆建炎以來朝野雜記郭后孝宗之正配也權攢於北山修吉寺

宋成恭夏皇后攢宮

咸淳臨安志在錢湖門外修

吉寺

宋史后妃傳后宜春人初入宮爲憲聖皇后閣中侍御普安郡王夫人郭氏歿太后以賜

王封齊安郡夫人卽位進賢妃踰年奉上皇命立爲皇后乾道三年諡安恭寧宗時改諡成恭

宋慈懿李皇后攢宮

咸淳臨安志在錢湖門外修

吉寺

建炎以來朝野雜記后安陽人父道爲湖北帥有皇甫坦者至其第道命諸女拜之其中

女慈懿后也皇甫見之驚曰此天下人母我奈何受其拜耶孝宗聞坦語卽爲恭王聘之淳熙十六年立爲皇后紹熙五年七月稱太上皇后慶元六年終壽康宮謚慈懿

宋恭淑韓皇后攢宮

咸淳臨安志在錢湖門外修

宋吉寺

建炎以來朝野雜記后相州人魏忠獻王琦六世孫淳熙十二年歸平安郡王邸第封新安郡夫人十六年受禪立爲皇后慶元七年葬慈懿皇后攢宮之東廣教寺謚恭淑

宋成國公主攢所

咸淳臨安志在惠因寺

武林舊事高麗

寺舊名惠因寺皇姑成國公主攢所

少師葉仲愈墓

萬曆杭州府志在大慈鄉赤山

謹按萬曆杭州府志少師葉仲愈墓不載時代未敢以他籍疑似者強相附麗爰據文錄存以備稽

考後
倣此

元儒學提舉葉廣居墓

杭州府志在赤山

賢詳名

明湖廣參議周文墓

杭州府志在高麗寺

分省人物考文

字宗武仁和人永樂甲申進士授翰林出爲兵部員外轉湖廣參議卒部民擁道哀號至爲服以送

櫬歸

宋少保忠勇李寶墓

武林舊事在定香橋

唐際盛少保李

公神道碑宋忠勇李公寶南渡後飛將也高宗時淮浙奸民造舟潞河由海道襲兩浙謀聞倉卒命將授公浙東路副總管駐平江捍海公抵江上遡西北風出大洋行三日風愈厲公酌酒自誓神色不沮方趣進師風又大作濤湧如山公行益奮時海州重圍旌麾彌望引兵登岸鼓行而前敵出不

意爲奪氣解去公獎誘忠義勉以功名招集降附
高宗聞之喜曰朕自用寶果立首功敕書忠勇表
其旌旗就除節度制置二品
賞賜有加卒贈檢校少保

明兵部尙書方賓墓 成化杭州府志在法公埠

明兵部尙書贈太傅諡忠肅于謙墓 名勝志在三

台山

詳名賢西湖遊覽志成化二年遣行人馬瞻
諭祭弘治七年賜諡曰肅愍建祠曰旌功萬

曆十八年改諡忠肅陸弼于忠肅墓詩荒墳鄰近
鄂王宮異代孤山伏臘同北狩忽聞哀痛詔中興
多仗保釐功百年天地同元氣五夜松杉度烈風
聖世祇今恢廟畧玉門聞已罷和戎陸棻謁于忠
肅墓詩荒祠殘碣兩峰秋社稷功高未乞休自信
丹心成鐵石已拚碧血染松楸黃龍塞遠枝南向
白馬江寒水逆流千古英雄
精爽在臨風憑弔淚難收

明僉都御史許子良墓

錢塘縣志在三台山萬曆

三十二年論祭葬

明吏部尚書諡恭懿張瀚墓

杭州府志在三台山

萬曆間論葬

詳名賢

明吏部員外郎錢養廉墓

舊浙江通志在三台山

杭州府志字國維仁和人萬曆己丑進士授工部都水司主事尋補吏部考功署郎中事張位當國要結大璫與吏部爭權尚書孫丕揚以清望特用養廉非閣臣意丕揚去養廉調驗封尋奪官歸

明湖廣副使許文岐墓

杭州府志在中台山

明福建按察使沈循墓

杭州府志在中台山

明刑部郎中項麒墓 〔萬曆杭州府志〕在馬婆嶺下

〔西湖遊覽志〕麒字文祥，仁和人。景泰間，以貢士授南京吏部司務。陞南京刑部郎中，以病告歸。卒年

八十

二

明高士高鎧墓 〔錢塘縣志〕在馬婆嶺。鎧孝事繼母

失撫育，羣弟有司旌其孝義，壽九十有三。

明吏部郎中張信墓 〔萬曆杭州府志〕在馬婆嶺子

失太僕丞瑛孫廣西參議銓耐

明河南布政司參政查志立墓 〔河南通志〕在馬婆

嶺

西泠志 卷二十五
宋貴妃賈氏攢所

咸淳臨安志在崇恩演福寺

武林

舊事崇恩演福寺寶祐丁巳重建爲賈貴妃攢所

宋周漢公主攢所

建炎以來朝野雜記在演福寺

咸淳臨安志寺在小麥嶺
祐八年充惠順貴妃賈氏攢所景定三年周漢國端孝公主附焉

宋雍王墓

成化杭州府志在崇報顯慶院

宋樞密金淵墓

武林舊事在小麥嶺樞密號冰壑

嘗作書堂於此因葬焉

宋金紫強至墓

萬曆杭州府志在小麥嶺

武林舊事至字

幾聖今石羊虎猶存其子淵明墓在西溪欽賢鄉諸子多耐此
夢梁錄強文憲淵明墓並在西溪

宋張夫人墓 四朝聞見錄慈明楊太后母張夫人

初被憲聖幸後歸李氏葬西湖小麥嶺地名放馬

場

宋翁孟寅墓 咸淳臨安志在小麥嶺孟寅字賓暘

號五峰

明都督僉事張眞墓 錢塘縣志在小麥嶺成化七

年諭葬

魏驥鎮守浙江左軍都督僉事進階榮祿大夫張公墓誌公諱眞字以誠靖難時以

武臣子弟援扈從功授彭城衛正千戶陞指揮同知陞徐州衛指揮使調浙江臨山衛陞浙江都指揮使僉事陞署左軍都督府都督僉事鎮守浙江平金華處州盜實授都督僉事加驃騎將軍上輕

車尉兼掌浙江都指揮使司事年七十二致仕卒年九十四葬於錢塘北山之原

宋郇國公贈太尉諡文憲章得象墓 萬曆杭州府

志在棲真院側

宋史本傳得象字希言浦城人進士及第楊億以其有公輔器薦之

歷知制誥翰林院學士官至鎮安軍節度使同平章事封郇國公贈太尉諡文憲

宋徐伸墓 萬曆杭州府志在棲真院 武林舊事徐典樂名伸字

幹臣號青山翁

明真人周思得墓 杭州府志在八盤嶺 詳方外

明吏部侍郎李旻墓 舊浙江通志在八盤嶺賜祭

葬 詳名賢

明廣西布政使沈敬墓 萬曆杭州府志 在丁家山

成化中諭祭

分省人物考敬字克欽錢塘人正統進士累轉廣西左布政使時田州黃

明倡亂率師克捷入賊巢中毒死

明副使陳洪範墓 錢塘縣志 在丁家山

元俞和墓 在仙芝塢

徐一夔俞子中墓碣子中諱和別號紫芝桐廬人父章遊

錢塘因家焉子中時得趙文敏用筆之法極力攻書篆楷行草各臻於妙用文敏私印莫辨其贗文章鉅家如黃文獻潛陳監丞旅每爲文必致子中書之至正初朝廷修遼金宋三史移文江浙行省繕寫鏤板遣翰林應奉張公翥視工屬子中按正有司奉幣請入局旣竣事行省參知政事秦公擬以學校官處之子中固謝其居有醉墨軒以洪武十五年葬於南山仙芝塢

明御史姚奇引墓

杭州府志在穎秀山

吳越太尉開府儀同三司謚貞獻薛居正墓

咸淳

臨安志在靈石山豕前生紫藤遍繞三峰之上其

三世孫昂官尚書左丞葬天竺山妙法院

元句曲外史張雨墓

萬曆杭州府志在靈石山玉

鈎橋

詳方外西湖遊覽志墓近玉鈎橋伯雨賣玉鈎所建也墓久頽廢成化間嘉興姚公綬復

葺之為立傳又為之銘曰此句曲外史居貞先生張公墓也南屏之右西湖之陽梁題玉鈎澗渡靈

石路披篠樹塢帶煙霞石室藏書碑文紀事其形雖逝其神則存翰墨在人文章垂世儼然生氣之

張皇警欬無聲周旋滅影穆若太虛而示寂開元精舍久無繼續之賢句曲居貞全乏訪求之彥遂

使墓門荒翳兆趾摧崩松柏推爲薪莫設時樵之
禁身世是何物曾罹夜客之侵痛茲劒躍雷津慨
爾硯離玉匣旣往無咎將來可圖曠世而默契予
心尙友而景行前哲姚綬題張伯雨墓詩百年尙
友重文章登拜孤墳一瓣香赤壁舟中驚鶴夢玉
鈎橋下奠椒漿匣藏神劍猶生氣雲闕秋山自老
蒼雙眼摩娑舊碑刻還疑清夜吐虹光仙去端依
絳節朝仙壇環佩竟寥寥字收渤海千軍陣詩逼
成都萬里橋黃篋樓空焦炬入清風堂廢白
雲銷惟餘靈石山頭月千古風華不待招

明贛州知府沈南金墓 在靈石山

許相卿中順大
夫贛州知府沈

公墓誌公諱南金字子輕家世郡城人爲錢塘博
士諸生嘉靖二年舉進士授南京大理寺右評事
歷寺正遷廣東廉州府補江西贛州府老於家
嘉靖三十一年卒年七十九葬於靈石山之陽

唐陳拾遺墓

武林舊事拾遺唐人歲久莫考名字

在積慶山下

宋樞密呂思恭墓

在積慶山

陳造樞密呂君墓誌君諱思恭字禮夫東

平人自承信郎積官至樞密院葬錢塘積慶山之原

元徵士王泰來墓

在積慶山

趙孟頫有元徵士王公墓誌公諱泰來字

復元其先大名人宋三槐文正公之裔因薦館於集賢院乞歸居錢塘自號月友處士公生於宋端平三年卒於至大元年年七十三葬於西湖茅家埠積慶山之陽

元賢婦趙夫人墓

在積慶山

徐一夔崔母趙夫人墓誌錢塘崔晟之母

曰趙夫人諱淑端魏國公孟頫之孫女湖州路總管雍之女處士崔復之妻寇陷錢塘處士遇害夫人奉舅姑神主以出教子成家喜觀書史有涉女事者記以自箴一時俱稱其賢洪武六年葬於錢

塘縣履泰鄉
積慶山先塋

明兵部尙書徐琦墓

錢塘縣志在積慶山

魏驥南
京兵部

尙書徐公墓誌公諱琦字良玉錢塘縣之江頭人
登進士擢行人司歷陞南京兵部尙書敕有祇事
國家勤勞茂著之褒景泰三年卒誥贈資政大夫
享年九十有八四年詔遣禮部論祭工部營葬墓
在錢塘縣履泰鄉之原西湖遊覽志徐尙書琦宣
德初以左通政使安南黎利餽金珠香繒悉却之
少師楊士奇畫梅題詩贈之云兩度安南奉使來
玉葩曾見嶺頭梅天朝使者清於玉不帶飛塵半

點
回

明廣西布政使參議吳鼎墓

在積慶山

許相卿泉
亭吳先生

墓誌嘉靖二十四年泉亭吳先生卒誌曰吳君諱
鼎字維新錢塘城北隅人正德中進士尹臨淮縣

時毅皇帝南征有中貴道臨淮非分徵索君銳身
先吏民擊傷中貴遂奏逮詔獄廷議白君還治徵
爲南京刑部主事轉禮部郎中遷廣西布政
使左參議卒年五十三墓在積慶山南麓

明雲南布政使陳善墓

舊浙江通志

在積慶山

詳見

名賢

宋關景仁夫人周氏墓

在履泰鄉

曾鞏關夫人周氏墓誌夫人諱

琬字東玉嫁關氏爲徐州豐縣令景仁之妻卒
於治平二年葬履泰鄉葛松原關氏錢塘人也

宋太府寺丞陳剛中墓

武林舊事

在風篁嶺沙盆

塢

萬曆杭州府志剛中福州福清人建炎二年登
第任太府寺丞應詔上封事主議恢復忤秦檜

編脩胡銓貶新州剛中啟賀其行云屈膝請和知
廟堂禦侮之無策張膽論事喜樞庭經遠之有人

遂與張九成等七人同謫差知安遠縣有詩云同日七人俱去國何時萬里許還家既至縣感瘴而歿其妻子扶柩抵臨安葬焉

明都御史李昂墓

錢塘縣志在風篁嶺下

舊浙江通志昂

字文舉仁和人景泰甲戌進士成化間出知青州屬歲饑昂請發廩以濟在治八年墾田至五千餘頃活饑民二十餘萬民列其治行三十四事立祠表海亭尋陞福建左參政歷官都察院副都御史弘治間討平劇賊楊九隆等民蠻讐服兩廣江右湖湘閩浙羣盜竊發昂親入賊巢斬獲以萬計改督漕運開河濬源卒賜祭葬大司馬華容劉大夏表其墓曰語云馬或奔蹏而至千里士或有負俗之累而立功名如文舉長才遠畧所至輒有建樹卓卓可紀彼其所存者大矣

明雲南巡撫都御史吳誠墓

在風篁嶺

張弼都察院右副都

御史吳公墓誌公諱誠字尙忠景泰辛未進士官
拜右副都御史巡撫湖廣時交趾弄兵敕巡撫雲
南公奮擊賊衆雲南輯寧卒於官黔國公遣官
歸櫬於鄉賜祭葬如禮葬於龍井山之風篁嶺

明廣東按察使副使許嶽墓

在風篁嶺

茅坤少厓許公墓表

子由西湖步風篁嶺東望封中佳氣其爲馬鬣之
阡固按察許少厓公自爲墓宮以待百年者也公
歿其子卜葬焉太子少保張公銘其墓武林怡老
會詩集許嶽字子峻仕爲南京工部主事歷員外
郎中直隸常州廣西柳州梧州三
府知府廣東按察司副使致仕

明太常寺少卿陳贄墓

萬曆杭州府志在風篁嶺

龍井山之原子右通政嘉猷耐

詳名賢

國朝德興知縣王起彪墓

錢塘縣志在龍井風篁嶺

學使王掞題曰異烈孤忠

季之芳表忠錄集虎子王公諱起彪以春秋成

進士授德興令三月化行而鄰封寇起公討之不克罵賊而死

吳越國元妃仰氏墓

咸淳臨安志在龍井山放馬

場

十國春秋仰氏湖州人天福八年冬忠獻王納爲元妃

宋兵部侍郎胡則墓

萬曆杭州府志在龍井廣福

院之麓

詳名賢范仲淹胡公墓誌寶元三年葬夫人潁川郡君陳氏附

宋知婺州東陽縣楊翱墓

在龍井

王安石太常博士楊君夫人金

華縣君吳氏墓誌故太常博士知婺州東陽縣事楊君諱翱字翰之夫人金華縣君吳氏葬於錢塘履泰鄉龍井之原楊君之卒也年六十七以慶曆二年從其先人已葬而夫人後君十六年以卒時

嘉祐二年年七十三而以明年祔於楊君之墓子端子蟠同時進士

宋浮梁尉吳天秩墓

武林紀事在龍井

章曠吳平甫墓誌

甫諱天秩初補太廟齋郎出爲大庾縣尉調浮梁縣尉卒於官世爲杭人平甫工於爲文有集五十卷卒於元豐三年葬於錢塘履泰鄉龍井之原合室邵氏而葬焉謹按平甫集不傳其題名見於南屏石屋摩崖今尙存

宋主簿關君妻曾氏墓

在龍井

曾鞏鄆州平陰縣主簿關君妻曾氏

墓表關君景暉妻姓曾氏建昌南豐人鞏之長妹也嘉祐二年卒六年葬於杭州錢塘縣履泰鄉龍井之原

承宣使方茂榮世墓

在龍井方山

王逢題方德玉先隴瑞芝卷德

玉之先扈高宗家臨安其六世祖茂榮昭慶軍承
宣使生椿年榮州防禦使生待舉恩州防禦使生
好問殿前都指揮使判太醫局生中廣東提刑亦
判醫生壽孫仕元廣平路醫學教授咸葬龍井之
方山其地負金鐘靈石至正二十三年夏四月
芝一本產指揮墓上予因序之并爲詩紀其事

明贈禮部尙書汪諧墓

杭州府志在龍井弘治十

三年諭葬子太常卿舉耐

分省人物考諧字伯諧
仁和人天順進士授編

修累陞禮部右侍郎兼學士
請老年六十八贈禮部尙書

明刑部侍郎沈銳墓

錢塘縣志在龍井

分省人物
考銳字文

進仁和人成化進士授刑部主事陞
應天府尹南京刑部右侍郎乞歸

明大理寺卿陳珂墓

杭州府志在龍井

分省人物
考珂字希

白錢塘人弘治進士授刑部主事歷陞都察院副都御史巡撫河南入爲大理寺正卿致仕

明處士費鏞墓

在龍井

邵經邦處士費西村墓誌鏞字鳴遠世爲錢塘人嘉

靖乙己葬於龍井山

明四川按察使僉事沈瑞臨墓

錢塘縣志在龍井

劉安山

舊浙江通志瑞臨篤志理學操行醇粹四方宗之稱爲約菴先生官終四川按察使

僉事

明太常寺卿嚴大紀墓

舊浙江通志在陸家均

陳秘書監褚玠墓

錢塘志補褚氏家譜云玠字良

璧陳時官秘書監卒葬九溪

謹按南史本傳玠字温理天嘉中兼通直散騎常侍遷中書侍郎除山陰令累遷御史中丞卒贈秘書監今家譜字曰良璧或別有所據者耶

宋貴妃黃氏攢所

武林舊事在西蓮瑞相院

建炎以來

朝野雜記貴妃黃氏光宗後宮涓熙末上在東宮高宗以和義郡夫人黃氏賜之及即位拜爲妃

宋貴妃蔡氏攢所

咸涓臨安志在淨教院

宋史后妃傳貴

妃蔡氏初入宮爲紅霞帳封和義郡夫人進婉容涓熙十年冬拜貴妃

宋贈秘閣修撰徐應鑣墓

杭州府志在方家峪

武林

紀事應鑣字巨翁江山人咸涓末補太學生德祐二年元伯顏師次臯亭山三宮皆北行應鑣與子曰琦曰崧女元娘誓不降登梯雲樓縱火自焚僕見鑣父子儼坐如塑驚撲滅之鑣與子女出戶不

知所之翌日得於井中皆僵立瞪目如生殯西湖
金井僧舍益王褒其節贈朝奉郎秘閣修撰後十
年同舍生劉汝均率儒生收葬方家峪廣嚴院側
號正節先生弘治正德年間爲建祠賜號忠節

明兵部侍郎何琮墓

錢塘縣志在方家峪弘治三

年賜祭葬

詳名賢

宋劉妃墓

董嗣杲西湖百詠引在方家峪鳳凰山

下褒親崇壽院後紹興中高宗敕葬妃子於此

武林

舊事劉氏臨安人紹興十年爲紅霞帳十六年封
才人轉婕妤婉容二十四年進賢妃無名氏題劉
妃墳詩秋風落盡故宮槐江上芙蓉並蒂
開留得君王不歸去鳳凰山下起樓臺

吳越國恭懿夫人吳氏墓

錢塘志補在慈雲嶺西

原

吳越備史夫人吳氏名漢月錢塘人中直指揮使珂女也幼以婉淑奉文穆王元瓘性慈惠而

節儉每聞王決事有及重刑者常頻蹙以仁恕爲言諸吳每有遷秩皆峻阻之及其入對多加訓厲故諸吳終夫人之世不甚驕恣救封吳越國順德太夫人廣順二年諡恭懿

明劉英墓

在慈雲嶺

詳名賢程敏政賓山劉君墓誌此杭詩人賓山劉君之墓

君字邦彥世居錢塘北郭之夾城里君爲詩精安流邕兼備衆體三吳兩浙之言詩者必曰邦彥天順中郡欲以明經起君君以母老固辭其別業在甘泉里多竹榜其室曰竹東晚號賓山皆終隱之意也卒年七十二葬南山慈雲嶺

明禮部主事傅巖墓

杭州府志在慈雲嶺下施家

山

齊高士褚伯玉墓

錢塘志補伯玉爲尙書令湛之

子生三子孟邦仲都季郡葬龍山

西湖遊覽志伯玉字元璩錢塘

人少有隱操寡嗜欲往剡居瀑布山三十餘年齊高帝手詔吳會二郡以禮迎遣辭疾上不欲違其志敕於剡白石山立太平館居之

梁博士褚仲都墓 在龍山

錢塘志補仲都字子京伯玉次子精周易之學

梁時爲五經博士生子修卒六十一葬龍山

梁褚蒙墓

錢塘志補蒙字治卿澧之子卒葬茶花

山

吳越國文穆王墓

歷代山陵考在龍山之南

吳越備史

元瓘武肅王第七子在位十年諡文穆和凝文穆
王神道碑雲起龍驤化爲侯王鴻鸞鳳翥立鷹
揚凜然勁氣卓爾雄銳大名之後五世其昌武肅
開基奄有吳越恩洽百城名馳雙闕旣委招懷復
專征伐裂土苴茅乘麾仗鉞尙父乘代元帥承家
傳榮襲慶奔葉重葩有典有則去甚去奢威名炫
赫事望光華譚藪縱橫詞泉浩渺曹植思遲崔儵
書少月夕花朝猿巖雁沼筆落彩箋風清綠篠神
傳射訣天富兵鈴龜文月角燕領虬髯威熊伏獸
名可愈疴撫衆以惠待士持謙事必有恒政皆求
理扶弱遏強先人後己但見偃風莫聞狎水阜康
烝黎廓清邊鄙量陂素廣德岳彌高禮延耆碩令
肅權豪庭趨忠烈府集英髦講論韜畧獎勸勲勞
自靖稱藩益勤述職虔布詔命動遵楷式每陳貢
輸常踰萬億表牽方隅匡扶社稷功庸罕對渥澤
無倫禮優伯舅位極人臣鎔金鑄玉龜鑑龍綸永
承當代莫繼芳塵禁暴戢兵取威定霸方賴控臨
忽聞薨謝雲慘長空星沉永夜號慟軍民涕泗華

夏初聞計奏尋輟視朝深嗟旦爽不及松喬倍加
贈送久罷簫韶君臣分至水陸程遙間傑淪亡英
賢繼襲擗踊悲摧無所迨及益務撫循加之周給
人情既安兵威自戢一方肅靜三世耀榮朝宗事
大誓志傾城欲光家世上奉聖明願書貞石用顯
聲名金玉令人鼓旗良帥德盛功崇文經武緯述
之莫窮言之無愧庶幾乎百世千秋人見之爲墮
淚兩湖塵談錢氏有兩浙三世四王東坡稱墳墓
之在錢塘者十有四暇日曾一披尋有所謂錢王
墳者山勢迴環氣局壯偉有邱壑然其前石獸數
枚制甚奇古不類今時所見一碑甚鉅字雖剝落
尙隱隱可讀石晉天福二年立稱守尚書台中書
令吳越國王蓋文穆元瓘墓也其餘則皆湮沒無
存錢氏保障浙民東坡之文盡之無復庸議但數
百年之後豈惟漫爲禾黍且

邱壙其間而往迹盡廢矣

吳越國忠獻王墓

歷代山陵考在錢塘縣龍山之

西南十國春秋王名弘佐文穆王第六子在位七年諡忠獻太常卿張昭撰神道碑

宋太常少卿沈周墓

在龍山

王安石太常少卿分司南京沈公墓誌皇

祐三年太常少卿分司南京錢塘沈公卒明年子扶子括葬公錢塘龍居里先公尚書之兆公諱周字望之以進士起家監蘇州酒爲侍御史按察江東自請得明州遂以分司歸第卒年七十四更十三官

宋壽昌縣太君許氏墓

在龍山

曾鞏壽昌縣太君許氏墓誌夫人許

氏蘇州吳縣人嫁沈氏其夫諱周太常少卿贈尚書刑部侍郎杭州錢塘人夫人以熙寧元年卒年八十三二年合葬錢塘縣龍居原子曰扶曰括有文學

宋司農少卿沈振墓

在龍山

沈遼伯少卿埋銘公諱振字發之世爲錢

宋塘人以大祠郎起家歷上高臨淮二縣主簿遷茶陵縣令以薦改大理寺丞遷太子中舍知剡縣移巴西縣改金華縣封殿中丞仁宗祀明堂拜國子博士出知藤州轉虞部員外郎進比部員外郎通判衛州英宗卽位以比部郎中乞監灤山靈仙觀今上卽位拜司農少卿封長興縣開國男食邑三百戶以熙寧六年卒於河東私第享年七十以明年二月葬龍山先塋之左

宋樂安郡君翟氏墓

在龍山

王安石樂安郡君翟氏墓誌尚書主客員

外郎錢塘沈君名扶之夫人翟氏以治平三年卒於京師男曰某翰林學士右諫議大夫知制誥曰迴泰州軍事判官曰遼將作監主簿監壽州酒曰邀漳浦縣主簿曰道將作監主簿今上卽位翰林守杭州夫人既卒詔以主客守蘇州葬夫人杭州錢塘縣龍居山舅姑之兆謹按長子不書名此沈邁也字文通後以字行此不書名蓋南宋時刻臨川集避高宗嫌名去之也

朱雲巢先生沈遼墓

在龍山

雲巢集附錄遼字敘達世為錢塘人應有

司不中乃次翰林公任為將作監主簿後監杭州軍資庫以被誣奪官徙永州改池州卒元豐八年

也還葬錢塘縣龍山著雲巢集十卷

明僉都御史鄭顥墓

在龍山

魏驥中憲大夫鄭公墓誌都察院右僉都

御史調福建按察司副使鄭公卒天順元年也明年葬於龍山先瑩之次公諱顥字士昂號思菴遠祖從宋南渡遂為錢塘人宣德間膺鄉薦明年會試中乙榜授江西撫州樂安學教諭以平賊功楊文貞薦擢御史陞雲南按察司副使歷大理寺少卿陞左僉都御史仍還雲南天順改元調福建按察司副使卒於建寧之分司

明封御史顧廓墓

在龍山

余寅顧公墓碑公諱廓字希曾曾大父自平湖

徒仁和為掾得尉龍溪遷清流簿是時閩徵粵兵
勦山寇公至輒布方畧以子鈴官福建道御史封
公如子官年八十
二葬於龍山之原

元敦武校尉鄒世聞墓

在鳳凰山

徐一夔元敦武校尉益都翼管

軍上百戶鄒君墓誌君諱世聞字文達登州黃縣
人世以武弁起家至正初告襲階進義校尉從討
峒寇得欵附張氏陷姑蘇有官資者多附之君怒
罵自度年老乃屏居峽石享年六十八葬於錢塘
鳳凰山擔
水闕之原

明都御史張本墓

萬曆杭州府志在鳳凰山報國

寺傍

明中書舍人吳潮墓

錢塘縣志在鳳凰山北觀音

洞

國朝御史顧豹文墓

在吳家山

錢塘縣志豹文字季蔚順治乙未進士知

眞陽縣行取爲御史

乞休享年七十五

明禮部尙書諡文昭江瀾墓

萬曆杭州府志在妙

因山

獻徵錄瀾字文瀾仁和人成化進士除編修歷陞禮部尙書諭葬贈太子少保諡文昭

明光祿寺少卿吳果墓

在龍華山

焦竑光祿寺少卿小江吳君暨

配宜人高氏墓誌君諱果字行甫別號小江世居錢塘都御史誠之曾孫父源江西按察副使君從憲副入燕見滄茅公以長女字之會女卒高文瑞公以女歸君君以中舍給事殿庭與修大明會典世廟實錄成陞大理寺評事兼翰林典簿晉郎中陞光祿寺少卿疏言文淵閣藏書宜謹上嘉納之

西清志 卷二十一
以年老乞歸享年六十
九與宜人合葬龍華山

國朝工部尙書諡文和陳斂永墓

舊浙江通志在八

封田

宋陶叔獻墓

在月輪山

沈邁陶叔獻墓誌廬江陶叔獻字元之廬江人父方

左侍禁杭州巡檢始家焉叔獻以皇祐元年三月登進士四月卒於京師與其考妣序葬於月輪山之東原嘉祐八年也

明知府翁汝遇參政翁汝進墓

杭州府志俱在六

和塔

杭州府志汝遇字子先仁和人萬曆戊辰進士初授東莞令權蕪關最後守朝歌俱有惠

政弟汝進字獻甫萬曆乙未進士授興化縣歷官至山東參政以忤逆端魏忠賢罷歸

明張振淵墓 舊浙江通志在六和塔之左世稱彥

陵先生

明施節婦徐氏墓 吳太沖施節婦墓誌錢塘處士

施繼山妻徐氏守貞苦節卒葬六和塔月輪山之

麓

宋提刑陸廣墓 在范村 王安石京東提點刑獄陸

刑獄公事兼本路勸農事朝奉郎尚書司封員外郎充集賢校理上輕車都尉賜緋魚袋借紫陸君諱廣字彥博其先吳郡人曾祖諱景遷仕吳越爲驍騎上將官檢校太傅祖諱崇辰以威武軍觀察推官從歸京師君以天聖二年進士起至皇祐四年以使走齊州卒於鄆之平陰以嘉祐六年正月

歸君於錢塘
范村之穴

宋右文殿修撰周杞墓

夢梁錄在徐范村之間

咸淳

臨安志杞龍圖格之弟也建炎三年知常州值苗
劉之變倡義勤王以功除右文殿脩撰洪內翰邁
跋其檄書謂公聞變憤踊即飛表請反正適忠穆
呂籀公制置淮浙兼領建康即馳介貽書議起兵
勤王協謀於是忠穆公及諸大將皆提兵境上凡
軍之百役芻茭薪蒸穀菽泉帛弓刀甲楯車船人
徒動以萬計辰索暮辦調遣彌縫不使一間語師
既東身獨留張杜要害使去者無却顧憂取日虞
淵功最右席邁常恨世徒知忠穆復辟之
功爲大而周公首倡大義則少有能言者

宋秘閣修撰趙鞏墓

咸淳臨安志在徐范村之間

武林紀事鞏字子固錢塘人登乾道進士嘗使金
問曰皇帝清問下民賦非汝作乎歎服之從遊者

甚眾號西林先生時禁僞學以
秘閣修撰知揚州編入黨籍

明兵部尙書諡端敏胡世寧墓 萬曆杭州府志在

五雲山嘉靖十年諭葬

獄徵錄胡端敏公世寧正德中由刑部陞廣西太平

府知府尋遷江西憲副時宸濠謀不軌吏江西者勢怵利啗惟其欲是聽間有稍知順逆者不過循默自保孰有奮不顧身如胡公者哉疏朝入而禍夕發竟以脫身間走得免灰滅及械擊掖庭備嘗百毒朝之用事者悉受濠賂幾陷不測矣賴御史徐文華申救減死得戍遼東躬履行間授徒以自業嗣濠誅起官累仕至兵部尙書太子太保公幼極艱苦寄食就學卓有經濟之志仕幾四十年雖祿一品被服飲食猶素士云

明順天府尹查秉彝墓 萬曆杭州府志在五雲山

桐樹塢嘉靖四十年諭葬

明詩綜傳秉彝字性甫海寧人嘉靖戊戌進士

除推官歷官

順天府尹

明長史俞起蛟墓

杭州府志在雁亭鄉

明浙江都指揮僉事王佐墓

在定山

趙寬昭武將軍浙江都指

揮僉事王公墓誌公姓王諱佐字廷輔永平之遷安人世習武公以俊秀充武學生後領父職弘治改元兵部奏授都指揮僉事赴兩浙備倭在浙土凡十年以久涉風濤感疾而逝時弘治十年也遺命葬錢塘以弘治己未葬於定山之原

吳越給事羅隱墓

夢梁錄在定山鄉

詳名賢

謹按研北雜誌云謝皇甫嘗至新城故老言羅隱給事冢在縣徐村之水塢冢碣猶存梁開平四年

沈崧志又紹興府志云隱寓居蕭山卒墓在許賢鄉明一統志隱墓在涇縣縣東七十里江西通志云羅隱墳在樂安縣羅家潭其說不同未知孰是今仍舊志存以俟考

宋鄜王諡武僖劉光世墓 咸淳臨安志在定山北

鄉萬曆杭州府志光世保定軍人高宗時授耀州觀察使屢戰勝金爲中興良將嘗仕浙西安撫大使累官安國公陝西宣撫使贈太師諡武僖追封鄜王無名氏題劉公墓詩將軍力盡馬蹄穿一片丹心萬古傳叱咤風雲起平地扶持日月麗中天寶刀掛壁血猶在丹詔褒功墨尙鮮到底英雄身不死旌忠長倚碧雲邊

西湖志卷之二十五

總校王詒壽分校

王彥起校
陳銛

西湖志卷之二十六

冢墓二

北山路

宋杜子恭墓

夢梁錄在錢塘

宋書自敘錢塘人杜子恭通靈有道術明

一統志孔稚圭東過錢塘北郭於舟中遙拜之

謹按南齊書孔稚圭本傳云稚圭父靈產太始中罷晉安太守有隱遯之懷過錢塘北郭輒於舟中遙拜杜子恭墓此蓋於稚圭傳中追敘其父靈產事非稚圭也

元國子監丞陳旅墓

萬曆杭州府志在西湖北太

學山

詳名賢

元鄭光祖墓

錢塘志補葬靈芝寺

詳名賢

宋尉曹將金勝祝威墓

成化杭州府志在雲陽洞

右

西湖遊覽志宋建炎三年完顏宗弼至臨安郡守康允之退保赭山錢塘令朱蹕鳩鄉兵二千

邀擊之力戰死尉將金勝祝威復集獨兵據葛嶺編竹覆泥爲大途以誘之羣騎馳至蹶躓而路什者鱗疊遂大駭遁赤山得奸細爲導由南壁入勝威被執死之郡人感其忠節駢葬雲陽洞之右

明禮部主事王洪墓

成化杭州府志在尉司下扇

胡儼王希範墓誌希範諱洪曾祖德甫祖善父輝世居錢塘舉進士任行人將命關陝得使職人賢之歷陞侍講遷禮部主事享年四十有二希範之學淳蓄深博期至於古人而不假之年其命也夫

明許昭遠墓

錢塘縣志在下扇一畝許昭遠與妻

盧氏並至孝人稱爲雙孝墓云

明沈禮墓

在金固山

宋濂錢塘沈君墓誌君諱禮字仲和錢塘其所居素善書

廣致奇異之書列度左右晝夜研索期不愧於古人行一善則喜否則若不能自容是非儒者之行耶卒以洪武九年墓在錢塘城西之金固山

宋資政殿學士諡莊敏章棗墓

武林舊事在寶石

山萬曆杭州府志棗建州浦城人歷官同知樞密院事立邊功爲西方最授資政殿學士中太乙宮使未幾卒賜卹甚厚命其婿劉何使兩浙供葬事贈太師諡莊敏

元貞白先生吾邱衍遺文冢

武林舊事吾子行先

生衍死於水骨朽淵泥西湖多寶院僧可權葬其

遺文於後山與其師骨塔相對乞銘於胡汲仲銘

示曰生弗瀆死弗辱貞哉白貞白乃先生之號也

詳名

賢凌雲翰悼吾子行先生詩布衣吾道士舉世莫能借遽作騎鯨客空遺夢蝶齋陽冰書瘦硬方朔語詠諧墓碣名貞白臨文每愴懷

宋邳王墓

咸淳臨安志在瑪瑙山

武林舊事寶雲觀邳王攢所

宋兗王墓

咸淳臨安志福教院王子兗王攢所

宋恭孝儀王仲湜墓

成化杭州府志在顯明寺

咸淳

臨安志顯明院舊名興福保清大中祥符元年改今額紹興初爲太傅儀王湜攢所西湖遊覽志仲湜當靖康時徽欽北駕六軍欲擁而立之王不從及高宗卽位於應天王鬲關詣行在命爲濮王後

薨葬於此南宋遺事
在北山虎頭巖下

宋施岳墓

古今碑目在虎頭巖

武林舊事岳字仲山號梅川吳人能

詞精於律呂楊守齋植梅作亭以葬薛夢桂撰墓誌

宋貴妃茅氏攢所

咸淳臨安志在茅寺

宋潤國公主攢所

咸淳臨安志在開元寺

宋秦國夫人毛氏墓

西湖遊覽志在嘉德永壽講

寺宋理宗時秦國夫人毛氏者皇后母也既老結

菴於此後遂葬焉

宋沖善廣王墓

咸淳臨安志在上智果院景定四

年充皇孫鎮安寧武軍節度使開府儀同三司

宋梁廣王墓

咸淳臨安志在巾子峰

武林舊事上智果院有梁

廣王

攢所

宋參知政事陳文龍墓

萬曆杭州府志在智果寺

旁葬之次日卽生竹竹俱有刺人不能登衆謂忠

義所感

堯山堂外紀景炎初興化軍降元陳文龍被執至合沙以詩寄仲子訣別云斗壘孤

危弱不支書生守志誓難移自經溝瀆非吾事臣死疆場是此時須信纍臣堪擊鼓未聞烈士樹降旗一門百指淪胥此惟有丹衷天地知

宋花翁孫惟信墓

夢梁錄在水仙廟側

詳名賢劉克莊孫花

翁墓誌銘季蕃客死錢塘妻子兄弟皆前卒故人
立齋杜公節齋趙公與江湖士友葬之西湖北山
水仙王廟之側季蕃孫氏名惟信季蕃字也貫開
封祖父皆武爵季蕃少受祖澤調監嘗不樂棄去
始婚於婺後去婺留杭最久其言以家爲繫縲一
身之外無他求一榻之外無長物無乞米之帖無
逐貧之賦終其身如此自號花翁名重江浙公卿
間非山水風月一不掛口長身縕袍意度疏曠見
者疑爲俠客異人尤重氣義嘗客孟良甫方孚若
家孟死猶拳拳其子孫孚若葬徒步赴之涓祐三
年九月卒葬以其年臘月杜公輔臣趙公大京兆
也季蕃一布衣以死託二公卒賴二公以葬且築
室買田祠焉天下兩賢之季蕃長於詩水心葉公
所謂千家錦機一手織萬古戰場兩鋒直者也中
遭詩禁專以樂府行余每規季蕃曰王介甫惜柳
耆卿繆用其心孫莘老譏少游放潑得無似之乎
季蕃笑曰彼踐實境吾特寓言耳然則以詩沒節
非知季蕃者以詞沒詩其知季蕃也愈淺矣銘曰

昔眉山公欲以和靖配水仙王其論已定余評季蕃和靖之亞儻分半席無不可者伯鸞要離異世同調曷不儕君偕侑新廟仇遠花翁墓詩水仙分地葬詩人一片荒山野火焚薦菊有亭今作圃掃松無子漫留墳蝸牛負殼粘碑石老鶴攜雛入壙雲欲把管絃歌楚些却憐度曲不如君

晉抱朴子葛洪墓 萬曆杭州府志在葛嶺寶雲寺

詳方外奚萊登初陽臺謁抱朴子墓詩人生擾擾間頗覺天地窄我憶抱朴子高堂睨空碧初陽出山上照破萬古石丹光動鼎鑄霧氣浮冠舄遺書上下卷道妙或黃白老衰及病瘦辛苦爲形役豈伊鳳鸞姿終以狐兔宅尸解本無形空飛靈復迹鄭君曾有傳勾漏恍所歷降子倘可問稚川特未隔幽林來颺颺缺井守蜥蜴神仙果何人海岳長獻劇世傳老聃死吾謂方朔謫虛墳誰所爲惟樹獨悲激滿前湖與山秋色落几席因茲些爾魂目送天邊翻薩天錫謁抱朴子墓詩煉丹仙子渺茫

間一夕乘風去不還火冷爐頭灰已燼雲封洞口
嶺長閒千年瑞氣生瑤草夜半天風響珮環眞境
空明自今古烟
塵依舊隔瀛寰

宋上官良史墓

萬曆杭州府志在北山招賢寺後

武林舊事良史
字季長號淇園

宋趙師秀墓

夢梁錄在葛嶺

詳名賢劉克莊弔趙
紫芝墓詩蔓草縈荒

嶺經過亦可悲世間空有集天下豈無詩盡出香
分妓惟留硯付兒傷心湖上塚誰復與刊碑薛師
石拜紫芝墓詩辛未聯詩別九載成恍惚大星墜
地旋無光君身入土名不沒吳越之水相交流寂
寞詩魂何處遊不聞孤鶴喚人醒空見梅花似人
影無復東巖招謝客應往西湖傍和靖世上如今
一句無一靈獨存勢欲孤我有生芻束未得只愁
宿草易荒蕪徐集孫拜紫芝墓詩晚唐吟派續於

誰一派纔昌復已而對月難招青塚魄見梅如挹
紫芝眉四靈人物嗟寥落千古風騷憶俊奇公去
遙遙誰可法少
陵終古是吾師

宋謚忠宣洪皓墓

建炎以來朝野雜記在葛嶺

元太史楊瑀墓

錢塘志補在葛嶺

詳名賢

宋德國公主攢所

咸淳臨安志在報恩院

宋婉儀魏氏攢所

咸淳臨安志在喜鵲寺

宋輔文侯牛皐墓

名勝志在栖霞嶺劔門關

王惟儉宋

史記皐字伯遠汝州魯人金入侵皐戰屢勝補保
義郎再攻京西皐十餘戰皆捷辟為同統制兼京
西南路提點刑獄尋改神武後軍中部統領偽齊
合寇岳飛遣皐行襄三日糧未盡城已拔敵攻淮

西飛遣臯渡江自提兵與臯會臯追擊之軍聲大震除武秦軍承宣使尋充河北京西撫司左軍統制加龍神衛四府都指揮使成德軍承宣使紹興十七年上巳日都統制田師中大會諸將臯遇毒亟歸語所親曰臯年六十一官至侍從所恨南北通和不以馬革裹屍耳明日卒或言秦檜使師中壽臯云

元溧陽州學正仇遠墓

萬曆杭州府志在棲霞嶺

詳名賢錢惟善拜仇處士墓詩詩窮八十年江海正淒然玉塵風生頰青山雪滿顛門墻張籍俊墓表孟郊賢出處人皆識哀歌徹九泉張翥謁仇仁近墓詩前輩凋零盡南陽有古阡詩應傳四海酒不到重泉槐國真成夢桃園亦是仙松根一掬淚慘淡墮風煙淩雪翰謁仇山村墓追和張仲舉詩韻并序洪武戊午清明恭謁栖霞先壙與南陽仇先生墓相鄰因酌焉偶閱張仲舉集有拜栖霞仇

先生墓絕句云淚灑荒苔積草中更無人跡紙煙空墳前惟有山茶樹開到清明自落紅因追和其韻敬弔先生落照中紙煙銷盡酒罇空

元左司員外郎張昱墓 萬曆杭州府志 在棲霞嶺

詳名賢七修類稿光弼號一笑居士嘗曰吾死埋骨西湖題曰詩人張員外某之墓足矣其後果如所言

宋少保鄂王謚忠武岳飛墓 夢梁錄 在棲霞嶺下

子雲耐

萬曆杭州府志初飛潛瘞九曲叢祠孝宗時改葬是處墓木皆南向景春間同知馬

偉脩葺取檜析幹爲二植墓前名分屍檜正德八年都指揮李隆鑄檜與檜妻王氏万俟卨三像跪墓前嘉靖十四年巡按御史張景刻盡忠報國四大字於石樹墓之南南宋相眼詔臨安府訪求岳

將軍屍其墳在錢塘門外當時私號賈宜人墳輟
耕錄岳武穆王墓自國初以來墳漸傾圮江州岳
氏諱士迪者與宜興州岳氏合力起廢久之廟與
寺無寸椽片瓦李君全爲杭總管府經歷慨然以
爲己任而鄭君明德爲作疏請褒忠義在天之靈
激生死爲臣之勸疏成郡人王華父一力興建趙
公子期在禮部倡議奏聞降命勅封名人多有詩
弔之趙孟頫岳鄂王墓詩岳王墳上草離離秋日
荒涼石獸危南渡君臣輕社稷中原父老望旌旗
英雄已死嗟何及天下中分遂不支莫向西湖歌
此曲水光山色不勝悲潘子素岳王墓詩湖水春
來自綠波空林人跡少經過夜寒石馬嘶風雨日
落山精泣薜蘿江左長城眞自壞鄴中明月竟誰
歌惟餘滿地萋弘血草色年年碧更多凌雲翰岳
鄂王墓詩前相汪黃後相秦力圖恢復竟何人朱
仙路近旌旗晚古汴城高草木春江月照空埋劍
獄邊沙遮斷屬車塵樓霞嶺下將軍塚夜夜悲風
起石麟朱彝尊岳鄂王墓詩宋室偏安日眞忘帝

業艱但愁諸將在不計兩宮還鄂國英雄士淮陰
 伯仲問策名先步曲薄伐自江關赤縣期全復黃
 河度幾彎龍廷生馬角雪窖視刀環城下盟何急
 師中詔己頒盈庭尊獄吏囊木謝朝班相狡妻兼
 煽和成主愈孱長城隳道濟大勇器成颺舊井銀
 餅失高墳石虎閒銘功存版碣鑄像列神奸曠世
 心猶感經時淚獨潛傳聞從父老流恨滿湖山北
 狩終難返南枝尚可攀墓門人寂寞江樹烏緜緜
 宿草經時綠秋花滿目斑
 依然潭水月終古照潺湲

國朝雍正九年知錢塘縣事李惺重鑄秦檜與妻王氏

黨張俊万俟卨跪墓前李惺鐵人銘鐵產於山等也何獨採而鑄此然則鐵

之汚亦大不幸也夫

宋尚書員外郎董京墓 成化杭州府志在棲霞嶺

掃帚塢子樞密院都承旨必先耐

元醫學提舉倪居敬墓

在掃帚塢

徐一夔元保冲大夫江浙官醫

提舉倪公墓誌公諱居敬字行簡杭州人遇異人授秘方至正中授醫學教授天兵下吳門徵至軍前療疾無弗愈洪武四年卒葬棲霞嶺掃帚塢

元湛淵先生白斑墓

武林紀事在棲霞嶺

詳名賢宋濂元

湛淵先生白公墓誌銘湛淵先生白公諱瑛字廷王家錢塘由太平路儒學正尋遷從事郎婺州路蘭谿州判官不復有宦情居西湖以湛淵自號天曆元年九月十五日卒年八十一葬錢塘縣履泰鄉棲霞山之陽其子遵治命題曰西湖詩人白君之墓銘曰虎林有哲夫秉德良優柔嗜義如嗜利避名如避仇指退以爲進謙抑以自修知分中自定不假外物求天經況所惇血淚交頤流冠冕百

行先偷品庶不偷發越見聲詩笙鏞間鳴球律呂
素和協八音交相繆雄章落四海虹氣日夜浮樓
霞有名山草木光如油紀
德薦石章千古振諸幽

元丞相墳柱墓

舊浙江通志在岳墓之東今有碑

表

宋烈文侯張憲墓

成化杭州府志在東山衙口元

總管夏思忠爲立表識

武林紀事宋岳雲張憲被秦檜誣害鄉人痛其死爲

之立祠祀爲土神雲墓在武穆王瑩域之內憲墳在岳墳西一里唐家巷側年遠爲土人占業止遺一邱淪於叢莽土人王天祐偶見此邱前有碣篆書題曰張烈文侯墓驚曰舊聞烈文侯有墓不意在此歸卽具言於當道時巡按張公縉遂拉同官相厥地修築瑩域仍樹碣於墓前以識舊也予目

睹盛美作詩弔之曰將軍墳墓久淒涼一段精忠
伴夕陽寂寂松篁鎖煙霧離離禾黍散牛羊遭逢
盛世褒忠烈整頓荒邱待表彰料得英靈終不泯
千秋猶自鎮錢塘後并侯廟亦新之時正德十四
年也

國朝烈女孫秀姑墓

錢塘縣志在東山街

馮景孫秀姑傳

孫氏錢塘人楊鼎元聘爲其子文龍婦父母亡歸
楊待年鼎元父子賈浙東秀姑依姑居與閭士積
鄰士積嘗穿壁窺秀姑日與羣嬖敲壁嗥呼辱之
秀姑慟哭曰我尚可活耶俟姑寢秀姑篝燈縫衣
裳上下聯綴飲鹽汁而死
大中丞張敏疏請建坊

明湖廣按察使僉事楊祐墓

錢塘縣志在青芝塢

子承憲祔

兩浙名賢錄祐字汝承錢塘人嘉靖己丑進士選庶吉士出爲湖廣興國州知

州尋轉濟南府同知爲政廉平民歌思之陞
江西僉事調湖廣僉事興利舉廢多善政

明舉人汪瀾墓

錢塘縣志在青芝塢

詳名賢

國朝御史趙蒼璧墓

錢塘縣志在青芝塢

明陝西參政錢鉞墓

杭州府志在佛牙塢

河南通志鉞字

大用仁和人成化中知汝寧府持身清謹律例精明部中熙然稱治在任九年陞陝西參政

宋御史毛子俊墓

錢塘縣志在西山玉泉

舊浙江通志子

俊汴人扈宋高宗蹕南來忠義慷慨嘗上書言事與秦檜忤罷官沒葬於此

宋學士柴士宗墓

杭州府志在玉泉寺西北

錢塘縣志

士宗本汴人宋高宗建炎年間兄弟二人扈蹕南渡一爲學士一爲校尉士宗卜居於杭卒葬玉泉

爲武林柴氏之始祖五百餘年子孫繁衍稱爲名家

元處士鄭德峻墓

古今碑目在西湖玉泉山碧梧

原左丞周伯琦題曰有元竹隱鄭處士墓

明副都御史錢宏墓

錢塘縣志在玉泉寺右

董承敘錢

公神道碑公諱宏字可容別號江樓正德戊辰進士試銓部政尋遷刑部廣東司員外執法明允轉山東按察司副使勞績最著民間公名輒曰錢使君青天也擢至都察院副都御史年六十有一其先本汴人扈宋徙錢塘公後葬於玉泉山祖兆之左有司所營葬也

明刑部員外郎邵經邦墓

杭州府志在玉泉山

浙舊

江通志字仲德庚辰進士明永嘉張璵與經邦同籍相得甚懽大禮議起經邦以工部改刑部主事

署員外郎世宗以陸燦言勒張璠歸桂萼致仕不
數月手詔追還逮燦下獄經邦欲進言未有間會
十月朔日有食之乃奏璠不宜召還議禮諸臣不
宜寵任太過且引皇父之詩以爲喻大畧謂議禮
與政不同禮在人心所向不一故可排衆論任獨
見若夫朝廷之政苟非開誠布公集思廣益不可
一日行也陛下卽能移此議禮諸臣亦安能掩天
下萬世耳目服愚夫愚婦之心耶疏入世宗震怒
廷杖幾斃禍且不測會乾寧東七所災得減死請
戍鎮海衛歷三十四年卒於戍所先是經邦爲工
部主事不肯附麗權貴在戍時潛心經史著有三
弘集學者謚爲弘毅先生

明許斌墓 錢塘縣志在玉泉山老人洞俗名鍋子

山村子廣東道御史賢附

國朝贈按察使僉事高咸臨墓

在玉泉山

錢塘縣志咸臨字與

侯順治乙酉貢生任福建永安令賊犯
永安城陷不屈死之事聞贈官蔭子

五節婦墓

舊浙江通志在西山玉泉傍錢塘毛氏

五節也陳氏許氏童氏孫氏查氏一門四世而苦

貞完節者繼踵人皆稱毛氏之家風

宋貴妃李氏陳氏攢所

咸淳臨安志在慈聖院

建炎

以來朝野雜記淑妃李氏孝宗後宮也初爲典字
淳熙三年冬轉通義郡夫人七年冬爲婕妤明年
秋卒贈貴妃時李壽在經筵因夜直嘗諫以後宮
多妄費上曰安得此聲近惟葬李妃用三萬緡耳
淑妃陳氏初封新平郡夫人淳熙十二年冬
進美人十八年冬進婉容紹興元年拜爲妃

宋永王祁王墓

咸淳臨安志在放馬場壽聖崇寧

功德院紹定三年改充皇子永王祁王攢所

宋直秘閣提刑周格墓 夢梁錄在獨角門步司前

軍寨前 咸淳臨安志格處州人直秘閣浙江提刑建炎元年討叛卒陳通與子肇丕俱遇害

高宗嘉其死節贈官敕葬其子耐焉

唐處士姚澣墓 古今碑目在西山澣吳興人唐大

中八年九月二十四日葬

國朝戶部侍郎嚴沆墓 杭州府志在西山 李震嚴公墓誌公字

子餐順治乙未進士累官至總督倉場戶部侍郎

國朝少詹事邵遠平墓 錢塘縣志在雷院遠平號戒

山康熙甲辰進士舉博學宏詞歷陞少詹事

宋濟王茲墓

建炎以來朝野雜記在駝巘嶺下

武林

舊事竝寧宗長子也先是寧宗得太祖十世孫昀以嗣沂王濟王與史彌遠有隙彌遠日媒孽於寧宗濟王出居湖州太湖賊劫濟王謀立之不從率州兵擊賊變聞彌遠稱詔殺濟王人多寃之尋乃見崇詔復王爵景定再任人傳與史彌遠有隙五年敕葬於駝巘嶺

宋都官員外郎元奉宗墓

在駝巘嶺

范仲淹都官員外郎元公

墓誌公諱奉宗字知禮其先臨川危氏也王考德照爲吳越王相賜姓元氏景德中公中甲科歷仕尙書屯田員外郎公思事松楸願得餘杭監郡詔從其請進都官員外郎景祐戊寅考終永定里享年七十八葬於錢塘履孝鄉駝巘嶺之先塋

宋太子少保諡章簡元絳墓

在駝巘嶺

蘇頌太子少保元章

簡公神道碑公諱絳字厚之錢塘人其先本危氏著姓臨川郡之南城縣後遷錢塘公由進士出仕熙寧八年拜參知政事卒贈太子少師按公生大中祥符己酉終元豐甲子以天聖丁卯登仕以元豐辛酉納掾起州縣歷中外華要而至丞弼自著作佐郎十三遷至尚書工部侍郎五易封爵至魏郡公凡九鎮藩郡而兼一路安撫鈐轄者四六經使任而江西河北皆再至入朝典領臺閣諸宮觀更踐省府總十一職以二品致政壽七十六在仕五十八年世鮮其比葬於杭州錢塘縣西山其墓去祖塋幾里許夫人太夫人並祔

原王氏蜀郡王氏並祔

謹按夢梁錄都尉周仰待制周邦彥少師元絳三墓并在南蕩山今考諸山無南蕩之名因元絳碑

有去祖塋幾里之文故以元絳墓次元奉宗後并二周墓亦附見焉

王氏世墓

在駝巘嶺

宋濂孝思菴記錢塘王驥晉丞相導後其裔孫耕以文行

稱周乾化中仕吳越官烏程倅烏程之弟畎遂居虎林中實驥之五代祖驥之祖名暹字子愚錫號爲明誼處士嘗圖地於西湖北山之間曰駝巘嶺有三奇石恠松根蟠其上預爲壽藏且曰此新兆也吾敢居其首乎南山梯子嶺先世數大墓存焉年遠不敢遷倣古者葬衣冠之義斲木爲主書吾父名葬其中他日吾則祔其傍菴廬三楹顏之曰孝思示後世不忘其先也

明清江知縣沈儀墓

錢塘縣志在桃源嶺

分省人物考儀

字茂德仁和人銳子正德舉於鄉授清江縣陞惠州府通判投劾歸端居靜養若孤鶴高騫有翩然致之

國朝處士陳廷會墓

杭州府志在桃源嶺

馬三寶墓

夢梁錄

在行春橋水竹塢教場內

錢塘縣志

按成化郡志墓在九里松行春橋水竹塢宋紹興末欲去之以廣教場方舉鍾有黑蜂數百出墓中不可近是夜帥夢一峩冠朱衣者告曰吾錢王之子葬此已久祈勿毀遂輟役至元十五年軍廝名狗兒者掘發之得鐵券一題曰雁門馬氏葬橫衝橋至元十五六狗兒壞我屋其定數如此夫鐵券所云馬氏似與俗呼馬三寶相符而又謂之錢王子何也世代漸遠無從質訂存以俟考

宋貴妃慕容氏攢所

咸淳臨安志在資德院

建炎以來

朝野雜記慕容氏哲宗後宮也崇寧元年封才人大觀二年進美人靖康之難六宮皆北去惟先朝嬪御得免乃建承慶院以處之紹興十四年冬拜賢妃年八十贈貴妃

宋貴妃張氏攢所

咸淳臨安志在永寧崇福院

宋史

后妃傳張氏開封祥符人初入宮封永嘉郡夫人
乾道六年進婉容淳熙七年封太上皇淑妃十六
年進
貴妃

宋杜汝能墓

咸淳臨安志在麴院

武林舊事汝能字叔謙太后諸

孫居麴院能詩有聲

明吏部侍郎茅瓚墓

杭州府志在盤龍山

詳名賢

宋通問副使直秘閣朱弁墓

在九里松

詳名賢西湖遊覽志

弁徽州人紹興初授官副王倫使金見執附表云
節上之旄落盡口中之舌猶存歎馬角之未生魂
飛雪窖攀龍髯而莫逮淚灑冰天高宗覽之流涕
後歸卒葬於此錢塘縣志弁卒於臨安稽留山後
四十年從孫熹官浙
中卜葬於積善峯下

明參議黃汝亨墓

舊浙江通志在花園橋下

詳名賢

元處士周天祐墓

在茅家埠

貝瓊貞孝處士周公墓誌公諱天祐字思

順其先沐人五世祖燧宋機察官扈從高宗南渡占籍於杭公好學讀書受易於吳興宇文子貞居家以孝聞監察御史李完者薦授嘉興路崇德州倅不赴洪武四年葬茅家埠祖塋之側

明太僕寺少卿吳謙墓

萬曆杭州府志在茅家埠

成化二十三年諭葬

明兵部侍郎陳禹謨墓

錢塘縣志在茅家埠天啟

間諭葬

分省人物考禹謨號心抑仁和人萬曆丁丑進士授中書選御史尋除江西巡按所

至簡肅終養里居十年起補巡漕陞太僕卿撫鄖陽轉刑部侍郎終於官

明禮部侍郎蔣驥墓
萬曆杭州府志在尉司里仙

即芝山

楊榮蔣良夫墓表良夫諱驥世爲錢塘人登洪武庚辰進士擢行人嘗奉命使郡國所至

皆仰風采永樂初陞翰林院檢討自是得盡閱古今之書未幾爲人所連逮繫獄十有餘年處之怡然洪熙改元得釋陞左春坊又陞翰林院侍講進侍講學士尋拜禮部右侍郎命下之日士林稱慶遂以疾卒遣官諭祭詔有司治墳塋

明山西按察使僉事王琦墓
成化杭州府志在仙

芝嶺

鄭厚僉事王公墓表公諱琦字文璣永樂甲午領鄉薦會試中乙榜授汝州學正拜河南

道監察御史陞山西按察司僉事提學晉陽士風爲之不變越二年改四川尋致仕晚年閉門自號百拙居士不營生產歲祿無以朝夕竟以是卒合邵士大夫咸痛惜之爲之禮而葬焉

明贈尙書江曉墓

萬曆杭州府志

在仙芝嶺

呂本江公

神道碑公諱曉字景熙別號瑞石正德戊辰中會

試第四人除兵部武選司主事歷官工部右侍郎

年七十有二穆宗卽位用臺

諫言贈尙書祭葬悉如制公輯詞宰文並承樂舉

明侍郎江鐸墓

舊浙江通志在仙芝嶺萬曆二十

三年諭葬

宋貴妃閻氏攢所

咸淳臨安志在顯慈集慶寺

明都督張奎墓

萬曆杭州府志在飛來峰石人塢

明都督牛桓墓

錢塘縣志在靈鷲山

宋諫議大夫楊大雅墓

在靈隱山

歐陽脩諫議大夫楊公墓誌云

宋 諱大雅字子正杭州錢塘人以諫議大夫集賢院學士出知亳州封號畧縣男食邑三百戶卒年六

十九有西垣集以景祐二年與漳南縣君合葬

謹按楊大雅初配漳南縣君張氏繼配卽廣平郡太君張氏歐公於大雅誌中不詳葬所第云葬杭州某鄉而廣平誌中則云葬於靈隱山祖塋則此墓當在一處也

宋 廣平郡太君張氏墓 在靈隱山 歐陽修廣平郡太君張氏墓誌

宋 楊公大雅以文行知名號有清節夫人張氏佐公以勤儉治家教子弟和宗族皆有法至和二年卒於高郵以嘉祐元年葬於杭州錢塘縣履泰鄉西村靈隱山祖塋之西

宋 直秘閣錢穌墓 武林紀事在靈隱天竺兩山之

宋 間 賢 詳名

宋翰林唐詢墓 在靈隱山

詳名賢沈遼翰林唐公祠堂記公諱詢字彥猷

仁宗朝為御史歷蘇杭青三州愛錢塘之靈隱以為山水為天下第一而公之幽宮乃卜於寶峰葬

後三年仲子垌為作堂於寺之西軒以申公志

宋冲晦先生徐奭墓 古杭雜記在靈隱山石筍院

詳名賢

明响嶼山人李元昭墓 西湖遊鑿志靈隱寺旁响

嶼山房故將軍李元昭隱居也年八十五預示遊

期乃葬焉

詳名賢

宋郭時義墓 錢塘縣志在靈隱山宋建炎間時義

母馮氏醫孟太后疾愈封國安夫人賜姓趙併墳

山

明驃騎將軍嚴德墓

萬曆杭州府志在靈隱寺西

西湖遊覽志將軍名德太平當塗人從明太祖討張士誠有功遂令守禦杭州會天台賊反德往討之中流矢卒上悼之贈驃騎上將軍追封天水郡公勅有司治葬於此

明僉都御史張濂墓

舊浙江通志在靈鷲山錢塘

縣志父贈吏部稽勲司員外郎應楨及弟光祿寺

署丞江俱葬此

明高士邵穆生墓

在靈鷲山

詳名賢黃汝亨高士邵虎菴塔銘先生諱

穆生別號虎菴弘齋公諱經邦仲子年三十餘卽屏居靈鷲山之呼猿洞卒卽葬於山廬之側冢上

置塔塔覆以亭

明行人陸培墓

舊浙江通志在靈鷲山

詳名賢

明知通州諸夢環墓

錢塘縣志在靈隱山

舊浙江通志夢

環字宇懷登進士出守通州恤刑薄斂有古循吏風

明光祿寺卿諸允修墓

舊浙江通志在靈鷲山

國朝文華殿大學士諡文僖黃機墓

錢塘縣志在靈

鷲山機字次辰順治丁亥進士授編修積官文華

殿大學士兼吏部尙書年七十五卒

國朝兵部侍郎項景襄墓

錢塘縣志在靈隱山

舊浙江通

志景襄字去浮號眉山順治壬辰成進士乙未廷對補檢討歷官兵部右侍郎卒於官

明太子太保經畧宋應昌墓

舊浙江通志在北高

峰下子守敬爾祔

明知代州贈吏部尚書黃思道子參政贈吏部尚書

克讓墓

杭州府志俱在北高峰下

舊浙江通志思道號黠菴

錢塘人萬歷庚午舉人除知代州崇學寬刑稱循良歿之日殮猶不給郡人悲號罷市贈中憲大夫廣東右參議今追贈奉政大夫吏部尚書克讓字含光萬曆甲午舉人戊戌進士官工部都水使權

荆州尋擢
廣東參政

吳越國順睦妃孫氏墓

夢梁錄在石人嶺下

錢塘志補

忠懿王妃孫氏名太真錢塘人泰寧節度使承祐之姊也少事忠懿王甚謹一以儉約爲訓漢制拜夫人周勅封吳越王賢德夫人宋開寶五年進封賢德順睦夫人九年王與妃及世子惟濬入覲加封吳越國王妃是歲歸國薨葬石人嶺

明禮部員外郎程文墓

萬曆杭州府志在石人嶺

下文徽州人屢官翰林院編修有文集行於世

明布政使夏時墓

成化杭州府志在石人嶺

詳名賢

唐許玫許現墓

萬曆杭州府志睢陽太守許遠之

二子玫瑰葬錢塘縣天竺莊雞籠墩

吳越國孝獻世子墓

咸淳臨安志在天竺前山

吳越

備史名弘傳文穆王第五子立
爲世子卒年十六諡曰孝獻

宋憲聖吳太后攢所

西湖遊覽志在石人嶺下時

思薦福寺爲高宗吳太后葬所墓前有二石馬琢

刻如生舊傳夜輒馳驟鞅轡光瑩如玉至今苔蘚

不侵

明工部侍郎嚴時泰墓

在上天竺

尤侗武林嚴氏墓道記時泰正

德辛未進士由縣令歷永昌太守四川布政陞巡撫有征蠻功進工部侍郎葬於上天竺東偏子之

清世襲錦衣千戶祔

明都督僉事許亨墓

錢塘縣志在天竺後山

楊榮許公

墓誌公諱亨鎮浙江都司二十餘年其沒軍士咸
奔送其喪去今四十年矣人猶思之不忘庶吉士
山陰秦瑛挽之詩曰門外日高閒劒戟海濱風靜
利漁樵又曰累朝功業黃金重一寸忠勤雪髮添
皆實錄也

明都督萬表墓

杭州府志在月桂峰歐家山

錢謙益萬

公傳公諱表字民望鄞縣人正德庚辰中武進士
以都指揮起家為漕運參將者二漕鎮總兵掛印
者二以都督同知僉書南京中軍都督府公於漕
政兵事無不洞悉所至皆建監甲寅海上倭亂散
家財募死士奮欲死之僉書南府道經姑蘇與倭
遇叟門楊涇橋率所募及少林僧邀擊身中流矢
遺書於子曰我家世以戰功死王事我身不任兵
晚年添一箭瘢不亦美乎公少嗜元學己而精閱

內典披衲入伏牛山曉行見日升忽大悟歷官四十年家無餘財拚鉢蕭疏與野衲雜處嘉靖中王汝中羅達夫唐應德以理學名於時公與之頡頏自號鹿園居士

元編修楊載墓

武林紀事葬錢塘

詳名賢

宋澹固先生宋斌墓

夢梁錄在資國寺右

萬曆杭州府志

斌字文叔袁州分宜人弱冠師晦菴先生受四書大義年八十私謚爲澹固先生

西溪路

參軍闕廷詔墓

杭州府志在秦亭山下

明長史裘自謙墓

錢塘縣志在碧峰山下仲子贈

奉政大夫之雄葬碧峰之右丹鳳山有丹山起鳳

坊

明沈棲霞墓

萬曆杭州府志在法華山

宋武義大夫畢進子節度使諡忠毅再遇墓

夢梁

錄並在西溪

宋史畢再遇傳進從岳飛轉戰江淮

邊事起再遇以功第一累遷左饒衛上將軍和好

成乞歸以武信軍節度使致仕年七十贈太師諡

宋敷文閣待制柳約墓

在西溪

周必大左朝議大夫充敷文閣待制

致仕柳公約神道碑公諱約字元禮秀之華亭人考諱廷俊述古殿學士公登大觀三年上舍第深於經術大爲學者宗宣和四年充編修汴都志尋爲徽州司錄改通判宿州七年拜監察御史靖康

初兼權殿中侍御史嘗論三鎮不可棄改尚書工部員外郎遷太常少卿除直龍圖閣知嚴州兼兩浙西路兵馬都監自是遂以忠勞召用未久而罷起知蔡州被命卽行畧無顧避用郊恩次對敷文閣待制紹興十五年告老是年卒於家享年六十四遺命以述古葬臨安之西溪諸子遂以是年亦葬公西溪去先塋纔數里云

宋集英殿修撰曾炎墓

在西溪

樓鑰集英殿修撰致仕贈光祿大夫

曾公神道碑刑部侍郎炎字南仲裔出南豐曾氏隆興元年進士淳熙八年知江寧縣紹熙元年遷大理寺主簿二年除司農丞三年擢知温州築瑞安石崗及平陽斗門慶元三年召赴行在除尚書郎中四年總領淮西江東兵馬錢糧五年除直敷文閣福建路轉運副使嘉泰二年除起居舍人轉起居郎兼權刑部侍郎三年郊祀恩封曲阜縣開國男食邑三百戶嘉定元年被命守婺未幾改姑

孰二年宗祀禮成進封開國子加食邑二百戶四年致仕薨享年七十一以光祿大夫告第官其後葬於臨安府錢塘縣欽賢鄉西溪山先塋之次有覺菴集與邑政總類藏於家

宋贈少傅諡襄恪趙密墓 夢梁錄在西溪欽賢鄉

宋史本傳趙密字叔微太原人用材武授河北隊將戍燕累功至太尉拜開府儀同三司領殿前都指揮使上疏告老以萬壽觀奉朝請隆興二年進少傅和議成罷為醴泉使乾道初卒年七十一贈少傅

明吏部員外郎虞淳熙墓 在西溪 詳名賢黃汝亨稽勲德園虞公

墓誌虞公以萬曆癸巳去官歸錢塘隱南山同峰下天啟元年沒三年葬於西溪七十二賢峰下謹按舊浙江通志載淳熙墓在雷峰塔下據黃汝亨墓誌墓實在西溪其所居在雷峰也

明贈刑部尙書洪有恒墓

西溪梵隱志在西溪子

贈太子太保刑部尙書薪祔

明刑部尙書諡襄惠洪鐘墓

萬曆杭州府志在西

溪東穆塢

詳名賢王守仁諡襄惠兩峰洪公墓誌特進光祿大夫柱國太子太保刑部尙

書兼都察院左都御史致仕洪公以嘉靖二年薨年八十一天子遣官諭祭錫諡襄惠賜葬錢塘東穆塢之原娶鄭氏繼周氏徐氏又繼魏氏尙書文靖公之孫女公墓合魏夫人之兆

明中書洪澄墓

西溪梵隱志在西溪阮家山

葛寅亮中

書洪澄傳澄字靜夫別號西溪太保鐘子也少擅文譽中正德舉人官內閣制敕中書兼修玉牒歸築別業於孤山晚年徜徉湖上足跡不入城市以孫瞻祖貴贈都察院右都御史

西清志 卷二十六
明推官洪吉臣墓

西溪梵隱志在橫山桐塢村

明祭酒馮夢禎墓

錢塘縣志在西溪梅塢

詳名賢董斯張

弔馮開之殯宮詩玉樹承無恙書來月甫更鶴傳
君子化鵬告主人行夜壑誰移棹寒天獨斲楹西
州門下路一過一吞聲構李距錢塘盈盈一水望
暫歸歸魄久短別別魂長談屑凋賓座歌塵冷妓
堂孤山新築墅
明月弔虛廊

明副都御史陳洪濛墓

錢塘縣志在荆山萬曆間

諭葬

余有丁陳公墓誌公諱洪濛字元卿自號抑菴舉進士尋擢江西按察副使乙丑入覲推

都察院右副都御史巡撫貴州兼督湖北川東軍務進階通議大夫

明太僕寺卿陳潛夫墓

杭州府志在荆山

詳名賢

國朝漕運總督諡清獻徐旭齡墓

錢塘縣志在荆山

馮溥徐公神道碑公諱旭齡字元文自玉山占籍錢塘父諱一鴻授徒玉山戊子江右寇發出避賊遇害公匍匐千里尋屍山谷間遇虎不顧夢父示以死所且告以毛廿八者乃得遺骸嚙指沁骨因負以歸一時傳爲孝感成進士前後居銓部八年流弊一清授雲南道監察御史累遷都察院左僉都御史巡撫山東陞工部侍郎督漕事公至淮以籌三便釐三害等疏請行自是歲省軍民金錢數十萬秋淮揚徐大水以公請得蠲賑閱視下河及賑濟徐州兩歲中水陸往還以勞卒年五十六

國朝處士陳祚明墓

錢塘縣志在鮮于山

明都督陳九思墓

錢塘縣志在小和山森羅塢

國朝吏部尙書徐潮墓

錢塘縣志在小和山

馮右曾家宰徐

公墓誌公諱潮字青來號浩軒癸丑進士由庶吉士積官至吏部尙書卒年六十九葬小和山之原塔附

孤山路

辟支塔 咸淳臨安志在孤山

晤恩禪師塔 咸淳臨安志在瑪瑙坡圓公孤山詩

有竹蔭高僧塔之句詳方外

宋智圓和尚塔 成化杭州府志在瑪瑙院詳方外

唐抱玉慧琳法師塔 在瑪瑙坡靈隱寺志姓戈新安人卅齡受業靈

隱西峰金和尚唐大曆中住下竺郡守杜陟裴棠棣盧元輔白居易先後並禮遇之比諸簪組上流

辭學高等或號毗曇孔子或名勝力菩薩
於靈隱講訓生徒二十載太和六年示寂

南山路

元中峰和尚舍利髮塔

成化杭州府志在雲居菴

吳越永明禪師塔

宗鏡錄傳在慧日峰

詳方外

國朝雍正十一年奉

旨重修立牌坊上刻

敕封妙圓正修智覺禪師之塔

元必才禪師塔

在南山演福寺

宋濂佛鑑圓照論師大用才公行業

碑師諱必才字大用姓屈氏台之臨海人以至正十九年滅度於南山演福教寺建塔寺之南偏奉

舍利
藏焉

明可授禪師塔

在南屏山

宋濂淨慈第七十六代
住持無旨禪師授公碑

公諱可授無旨其字也一號休菴台之臨海李氏
子洪武六年住杭之中天竺寺居二載退歸卧竹
院而寂世壽六十九僧臘五十以遺骼歸龍塔而葬焉

明濟慧禪師戒公塔

成化杭州府志在虎跑寺大

理寺少卿楊復撰銘

宋贊寧禪師塔

靈隱寺志在龍井

詳方
外

宋辨才法師塔

咸淳臨安志在龍井蘇頴濱爲塔

碑詳方外蘇軾辨才塔銘如來昔在世心禪語爲
教譬如四大海惟是一濕性性於濕性中變化

千萬億風來爲瀾濤風去爲湛然魚龍所遊戲鬼神所出沒船筏借其力網罟取其利其上爲洲渚諸國所生育其下爲淵谷百恠所藏伏東西出日月上下屬河漢觀者不能了矐眙何暇說如來知迷悶隨變爲解釋因變所說者是則名爲教彼善聞教人當如是幻爾旣已知是幻則當塞其實我觀世教師皆謂教其實由是教實故則爲禪所訶禪雖訶乎教終以教致禪禪若不教是杜所入門教而不知禪是不識家也辨才眞法師於教得禪那口舌如瀾翻而不失道根性湛如止水得風輒燦然心是於東西普福禪教師士女常奔走金帛常圍繞師惟不取故物來不能拒道成盡有數西方一瞬息西方亦非實要有眞實處

明原璞法師塔 在龍井

宋濂杭州集慶教寺原璞法師璋公圓冢碑洪武元年

年杭之顯慈集慶教寺原璞法師滅度於京城大天界寺其弟子奉靈骨歸窆於郡之龍井辨才塔

南師諱士璋字原璞受生於海寧王氏年十九除
髮元至正十三年主州之棲真教寺棲真與南天
竺演福隣古稱教海法師時往叩焉二十
年移住旌德教寺詩文有別錄若干卷

梁傅大士塔

錢塘縣志在鳳凰山龍華寺

明蓮池大師塔

西湖夢尋在五雲山

詳方外

北山路

唐修真了義禪師塔

錢塘縣志在葛翁井

唐烏窠禪師塔

董嗣杲西湖百詠詩引在定業院

後太和七年示寂後人發塔惟見碑銘

詳方外

宋三藏道法師塔

成化杭州府志在九里松

宋大智照律師塔 錢塘縣志在靈芝西北

宋瑞光卧塔 靈隱寺志在月桂峰下慈雲大師示

寂時有大星墮地因葬題曰瑞光卧塔

晉慧理法師塔 靈隱寺志在迴龍橋道左

詳方外虞清熙

慧理大師塔銘石燕拂雲嶺驚入吳公錫於飛猿
心可呼安安而思月運雲駛生滅毀成亦復如是
謂公蓋疎雞足與彝謂輪蓋傾鼈足與支幡搖鳥
警棋積星碍骨妖斯濯黑囊佩虛如梵天宮乘往
當來南紅泗影不騫不摧釋氏稽古畧山有寔坐
之巖號理公巖今瘞塔存焉慧麟瑞慧理祖塔詩
為問開山祖雙猿洞未封全身當谷口一塔屢迴
龍錫掛西天月雷轟鷲嶺鐘欲知真面目溪水盡
朝宗釋山顯慧理開山祖塔詩欲表靈峰異迦維
特地來雙猿呼洞出五寺鑿靈開石塔當溪口全

百明志 卷二十一 六 冢墓二

身聽壑雷到山先
觀面誰慮沒荒萊

後周神尼舍利塔

西湖遊覽志在靈鷲峰頂

錢塘縣志

隋文帝始生尼知其貴帝長尼私謂曰佛法暫廢
俟汝而興屬周武廢教尼隱帝家而卒及帝卽位
令天下造佛塔而以尼舍利函資至靈山造塔焉
釋山顯神尼舍利塔詩揀漢淨圖古傳來隋代時
神通仙佛母襁褓帝王兒鬧市知真主
深宮禮聖師靈山藏舍利斑剝故朝碑

唐無着文喜禪師塔

西湖遊覽志在靈隱山畔

詳方

外武林紀事乾寧四年住靈隱殿葬慈光院後遷
靈隱蓋後唐光化三年也歷十三甲子計今順治
七年庚寅七百五十一年山僧作圃種菜闢地九
尺及師缸頂有小鉢破之黑氣冲天良久方散啟
視之則師跌其中前髮僅覆額後髮下垂蔽體腳
指三匝於身手指甲僅一匝笑容如生衣微紅色

按之如灰煙然此
九月十三日事也

宋佛海禪師塔

在靈隱山

周必大靈隱佛海禪師遠公塔碑師姓彭氏名

慧遠眉山人乾道五年詔住臯亭山崇先寺六年開堂於靈隱賜號佛海禪師淳熙三年上元安坐而化是月葬烏峰之塔世壽七十四僧臘五十九

元輔良大師塔

在靈隱山

宋濂杭州靈隱寺輔良大師石塔碑洪武四年

正月靈隱釋氏大師滅度報年五十五僧夏四十用闍維法從事火滅得舍利盈升其弟子以是年瘞骨於歸雲塔實在寺東偏大師諱輔良字用貞號介菴蘇州吳縣人姓范氏文正公十葉孫受戒住天平山白雲寺從笑隱訥公契其心法後住杭之中天竺預知代期端坐書偈而歿

晉道翊祖師塔

錢塘縣志在乳竇峰

詳方外上天竺山志崇禎

丁卯夏住持照本重立石牌坊一座題曰晉開山
聖僧道翊祖師之塔縣侯王揚基書額癸酉冬重
加塔門柱檻
琢石新之

隋眞觀法師塔

成化杭州府志在天竺東岡靈隱

寺志觀法師葬地久圯宋慈雲募王欽若重修

贊甚工

詳見方外楊蟠眞觀法師塔詩東岡人不
識野寺在樵漁落葉年年滿春風爲掃除

郭祥正眞觀法師塔詩宰屠藏眞骨東岡氣象殊
煙雲掃不盡苔蘚一痕無釋遵式眞觀法師塔詩
五六百年內金軀亦化塵方知新冢上盡是古人
身白髮爭名急青山送骨頻除師靈塔外一一好
沾巾

宋日觀大師塔

武林紀事在天竺山

詳方外范仲淹天竺山中

觀大師塔記師錢塘人姓仲氏名善昇皇祐元年
余至錢塘就山中見之一日遣侍者持書謝余將
去人世必藏於浮圖之下願公記焉又一日侍者
來告曰師化矣其門人藏師於塔銘曰山月亭亭
師之心山泉泠泠師之琴其性存
兮孰爲古今聊志之兮天竺之岑

明慧日大師塔

在天竺山

宋濂上天竺慈光妙應
普濟大師東溟日公碑

皇明奄有方夏有學僧伽奉詔入京數召見字而
不名及建鍾山法會師說毘尼淨戒洪武五年辭
歸杭之上天竺山秋七月朔夢青蓮花生方池中
召弟子曰此生淨土之祥也至四月書頌而寂世
壽八十九僧臘七十二其月藏於山之西峰
妙應塔院師諱慧日號東溟天台赤城人

國朝伯亭大師塔

在法華山之陽

徐自洙伯亭大師
塔誌師初名續法

更名成法伯亭其字灌頂其號也仁和亭溪人俗
姓沈少受法於德水法師戒律精嚴後駐錫上竺

聿新殿宇厥功甚鉅

謹按吳山在城內向屬禁地無墓塋故不列吳山路

即慧日大彌勒

野天竺山

宋將上天竺慈光寺

西湖志卷之二十六

總校姚烜分校

吳鳳皆吳壽臧校

西湖志卷之二十七

碑碣

一

夫披文相質宏於齊梁後世紀勝題年益復雲起
要以流風跡導餘薰其致一也西湖碑碣相望眉
山涑水並有摩崖旣鵲顧以龍盤亦鯨呿而鼈擲
爲嗜古者所耽翫焉爰搜白瓦用次丹書未虞岸
谷之殊或藉琳瑯之載云爾志碑碣

孤山路

看壁法華經

舊在孤山寺卽廣化寺見元稹
孤山石壁法華經記文見寺觀

陳襄竹閣題名

舊在廣化寺內熙寧七年立石咸淳四年重立見咸淳臨安志

蘇軾六一泉銘

舊在報恩寺內明洪武初釋行昇重立見西湖遊覽志文見山水

歲寒巖三大字

在孤山巖

歲寒巖

篆書

郭令公歷中書二十四考廣成子住

空同萬八千年

字已漫漶西湖遊覽志云相傳蘇軾書

林逋墓碣

舊在墓前和靖先生墓咸淳四年金華王庭書立石見咸淳臨安志

謹按金石之文每多散佚凡現存者依洪氏隸釋例悉據原文登載於左惟佛經無庸全錄及詩文已載別門者俱一一注明其或文不足錄者止登時代歲月或碑已遺亡而原文尙散見羣籍者則用小字錄出卽注本行之下以存其舊俾覽者有考焉

重建巢居閣記

舊在孤山江浙儒學提舉長沙李祁記又大理少卿夏時正記并書篆見

成化杭
州府志

宋孝宗書蘇軾陳朝檜詩

舊在孤山之南檜傍立石小亭內見咸淳臨安志

重修西湖書院記

舊在孤山之南貢師泰撰見成化杭州府志

西湖書院田記

舊在孤山之南黃潛撰見成化杭州府志

重修西湖書院記

舊在孤山之南山長陳泌記又夏時正記并書篆見成化杭州府志

錢塘先賢堂記

舊在第一橋中書舍人王壑撰見咸淳臨安志文見祠宇

先賢堂鄉名士列士贊辭

舊在堂側見武林舊事

南山路

涌金池三大字

舊在湧金門內吳越王元瓘書清泰三年丙申之歲建午之月特開此池

見夢

洞古經

舊在湧金門外顯應觀

宋文見疏

顯應觀碑

舊在湧金門外觀內嘉定三年樓鑰奉詔撰并書見咸淳臨安志文見寺觀

彌陀頌

舊在靈芝崇福寺內蘇軾撰并書見古今碑刻

靈芝崇福寺記

舊在湧金門外寺內宋參政何澹撰見成化杭州府志文見寺觀

靈芝崇福寺賜田記

舊在寺內宋丞相鄭清之撰見成化杭州府志文見寺觀

表忠觀碑

在今錢王祠門內兩列

朝奉郎尚書祠部員外郎直史館權知徐州軍州

事騎都尉蘇軾撰

文見祠宇

嘉靖三十六年杭州知

府陳柯重摩立石

正書

華巖經

舊在雷峰塔上圍繞八面吳越王錢俶撰記見咸淳臨安志

湖隱上人贊

舊在淨慈寺爲濟顛作不署名見元牘記

家人卦

在南屏興教寺後

三三家人利女貞

至

反身之謂也

隸書分十二行字徑八寸摩崖

樂記

在家人卦後

君子曰禮樂不可斯須去身

至

舉而錯之天下無

難矣

隸書分十行字徑八寸摩崖

中庸

在樂記後

子曰道不遠人

至

君子無入而不自得焉

隸書分十行字

徑八寸

右司馬溫公書

正書摩崖

謹按以上三篇書法同末題司馬溫公書武林舊事云此唐人書後人添刻溫公其實非也考光之父司馬池於康定元年知杭州後亦封溫公或其守杭時書此以教民正未可知光本傳稱光於寶元初中進士甲科因池在杭求簽蘇州判官事以便省視故池有敘述吳越風俗文係光代作見於傳家集此段摩崖大抵池為守時所刻故咸淳臨安志亦稱溫公書也

琴臺二大字

在家入卦傍

琴臺

行書字徑三尺

米芾書

正書摩崖

三生石三字

在家人卦傍
篆書摩崖

周昌題名

在家人
卦傍

南山之隈白石巍巍上有丹崖下有琴臺彌天然
師與我游哉勒名石堅庶播將來至正甲午仲春

吳興周昌書於南屏石壁

正書
摩崖

張若谷等題名

在南
屏

龍圖閣學士刑部侍郎知府事張若谷兩浙路體

察訪安撫三司度支判官稅課轉運使司勳郎中張

從華康定辛巳暮春二十三日游晏此山盡日而

去

正書
摩崖

蔡襄等題名

在南
屏

資政殿學士諫議大夫知軍州原武鄭戩天休轉

運使尙書兵部員外郎隴西李定子山轉運使尙

書口部員外郎東平呂覺秀民尙書祠部郎中集

賢校理彭城錢仙游綺翁著作佐郎館閣校勘甫

陽蔡襄君謨慶曆元年辛巳十二月十日題

正書
摩崖

鄭民瞻等題名

在南
屏

鄭民瞻德常弟民監先覺民度仲詳陳浚口叔徐

代用用之上官□□□黃應叔和慶曆二年□午

蘇温雅等題名

正書字徑
三寸摩崖

蘇温雅等題名

在南
屏

蘇温雅舜欽楊混慶曆二年八月六日倩仲題

正書

字徑五
寸摩崖

浦延熙等題名

在南
屏

宋皇祐辛卯歲季秋旣望浦延熙李喬游南屏山

王題記

隸書字徑
五寸摩崖

魯元翰題名

在南
屏

西清志 卷二十七
魯元翰熙寧乙卯仲夏再游

正書 摩崖

王廷老等題名

在南 屏

王廷老伯敷張靚子明孫迪彥誠胡志忠仲舉吳

君平常甫郭附明仲熙寧八年四月廿三日同游

南屏興教寺

正書 摩崖

晁仲舒題名

在南 屏

晁仲舒與姪端彥張援同游

正書 摩崖

樓鑰少林二大字

在南 屏

少林

正書 字徑八尺 橫寫

攻媿

正書 字徑一尺 在大字左 摩崖

艮卦

在幽居洞

艮其輔言有序悔亡

隸書字徑六寸摩崖

損卦益卦

在幽居洞

三三山下有澤損君子以懲忿窒欲三三風雷益

君子以見善則遷有過則改

隸書字徑六寸摩崖

雲壑二字

在南屏字徑五寸摩崖隸書

蒼谷題名

在南屏

蒼谷題

正書字徑尺餘摩崖

左傳晏子語

在太子灣

晏子曰君令而不違臣共而不貳父慈而教子孝
而箴兄愛而友弟敬而順夫和而義妻柔而正姑
慈而從婦聽而婉禮之善物也

隸書分五行字徑一尺書法與家人

卦同
摩崖

乾祐鑿佛贊

在石
屋洞

觀音自在菩薩尊像一軀并裝彩龕室等因而讚
曰大聖觀音身現塵刹隨聲響應咸見菩薩了茲
寶相孰不解脫善哉淨信本惠清豁命乎鄙手倚
巖鐫割水月現前儼然生活乾祐二年歲在己酉

九月十日日記

小行書摩崖又有數段
並吳越時刻文莫辨

陳襄等題名

在石屋洞

陳襄蘇頌孫奕黃顥曾孝章蘇軾同游熙寧六年

六月二十一日

正書
摩崖

謹按咸淳臨安志云石屋洞崖彷彿有東坡題名
傳云黨禁時鐫去今字畫朗然此出後人重刻是
以書法遠不逮龍華

王廷老等題名

在石屋洞

睢陽王廷老伯敷錢塘吳君平常甫大名王頤正
甫昭武上官塏彥明臨川王安上純甫同游熙寧

癸丑七月己未

正書字徑四寸文右行摩崖
又一刻在水樂洞題名人同

魯元翰題名

在石屋洞

熙寧甲寅十月二十五日扶風魯元翰游石屋洞

君彥君亮侍行

正書摩崖

王廷老等題名

在石屋洞

王廷老伯敷吳君平常甫孫迪彥誠胡志忠仲舉

郭附明仲張靚子明熙寧八年四月廿三日同游

石屋洞

正書摩崖

潛說友題名

在石屋洞

潛說友來

咸淳五年七月望日

正書
摩崖

大德鑿佛記

在石
屋洞

昔在石晉佛天福年中開山建院刊堅珉爲瞿曇
羅漢像凡七百餘尊星霜屢易大欠莊嚴遂投誠
檀信擇吉鳩工重繪重整再□再新以廣其傳願
一切人普同瞻仰後之人繼承我志時理之庶永
示於不朽也□德□年歲在壬寅住山永隆識

正書

摩崖

謹按年號上失二字考壬寅歲爲元大德之六年也

員嶠真逸等題名

在石屋洞

皇慶壬子九月八日員嶠真逸河東李侗士弘偕

淨慈晦機中竺元叟明慶市巖演福湛堂會稽千

巖同游男思德侍行是日風高氣清乘輿就高峰

行書
摩崖

施振等題名

在石屋洞

至正戊子夏四月望郡人施振楊瑀莫昌鄔進禮

同游

隸書
摩崖

沈嘉等題名

在石屋洞

皇元至正壬寅冷食通州沈嘉彭城羊宣河東張
齊燕南孫中古越張朗杭州王皞武林王旬太原

王萃同游

正書
摩崖

煥著等題名

在石
屋洞

至正十四年三月六日奉御煥著檢校王謙照磨
任士文管勾張晉掾史王昉部管勾王畋永嘉陳
昧同游南山諸公俾昧書於石屋洞以識歲月

正書

摩崖

楊朶兒只班題名

在石
屋洞

至正十四年暮春中臺知印楊朶兒只班偕潭州

總管伯篤魯丁同游

正書
摩崖

方豪石屋二大字

在洞內

石屋

草書字
徑尺餘

思口書

行書名滅
一字摩崖

謹按西湖志諸洞名皆棠陵
方豪書豪字思道此豪書也

孫克弘燕谷二字

在石屋

燕谷

隸書字
徑四寸

雪居

正書
摩崖

孫克弘雲窩二字

在石屋

雲融

篆書字
徑五寸

雪居

正書
摩崖

姚原道等題名

在石屋

丙辰季秋廿九日通川姚原道彥聖與弟原古伯
玉原仁安叟原孝景純同游子姪滂汲滌沈炳澣

侍行

正書
摩崖

吳涵石屋洞詩

在洞內

石屋雲深處煙厓日午時坐來幽興極老我一題

詩 丹園吳涵

正書
摩崖

西關淨化院碑

在水樂洞

西關淨化禪院新建之記

題額
篆書

開運三年歲在

丙午二月十日記

正書文
見寺觀

謹按此記載咸淳臨安志不著撰人書人姓名今
觀碑字泐裂過半惟首行題名處撰字上有冲援
名書字上有遂徵
名然難求其實矣

淨化院經幢

在水
樂洞

佛頂尊勝陀羅尼經

經不
錄

紹熙壬子三月癸酉

朔二十二日甲午內侍武功大夫主管佑神觀李

聿建

小楷內止二
面字微可辨

蘇軾水樂洞詩

舊在洞傍咸淳中刻
石見咸淳臨安志

孫克弘清響二字

在水
樂洞

清響

隸書字
徑尺餘

華亭雪居書

正書
摩崖

尹彥明等題名

在煙
霞洞

雒陽尹彥明趙伯奕邢叔端朱晞真致一時可子

寅寧極維方紹興戊午十月四日同來

篆書
摩崖

謹按朱晞真名敦儒朱子極稱
其能書此段玉筋篆敦儒筆也

周氏世德記

舊在滿覺壠朝奉大夫太常博士知
常州王安石撰見成化杭州府志

謹按襄陽志林周輝云曾祖仁熟於王荆公爲中
表請得上世墓誌託米元章書入石號世德碑卽

此碑
是也

劉公泉三字

在南高峰下宋常平劉常翬池因
篆書三字於石見萬曆杭州府志

大佛字

在南高峰

佛

正書字
徑八尺

慶元丙辰三月八日檀越胡安錢塘

景明就石書本口邱大榮刻

巖主淨津建

隸書
摩崖

虎跑寺經幢

在寺門
天福六年立小楷末
有建幢記行書大字文多不辨

虎跑寺碑

在寺內

大慈山定慧禪師寺記

篆書
題額

至治三年十月甲

申日記

正書碑半
在牆內

虎跑泉碑

在寺內

虎跑泉銘

篆書

前翰林學士承旨嘉議大夫知制

誥兼脩國史兼太子贊善大夫金華宋濂撰并篆

額 前僧錄司右普世天界善世禪寺住持天台

沙門釋宗泐書 洪武二十三年夏六月初八日

中天竺寺淨戒當代住山首記同立石

正書文見山水

蘇軾游祖塔院詩

在虎跑寺洪武二十三年重摩刻行書詩見寺觀

虎跑泉記

在泉上大理少卿楊復撰見成化杭州府志

玉岑二大字

在玉岑山許采書摩崖見西湖遊覽志

李忠勇神道碑

在赤山

高麗寺尙書省牒碑

在寺內

尚書省牒

大字行書

前任持平江府吳江縣華嚴寶

塔教院僧清遠

小字正書

牒奉敕宣差住持臨安府

南山高麗慧因教寺牒至準敕故牒

大字行書

寶慶

三年正月日牒

小字行書尚書省印

少師右丞相魯國公

押

參知政事宣

押

參知政事薛

押大字行書右行

尚書省牒僧清遠

大字行書尚書省印二

臨安府劄

小字正書

文不錄

寶慶三年正月日

小字正書尚書省印

少師右丞

相魯國公押封

大字行書尚書省印二

高麗寺碑

在寺內尚書省牒碑陰正書字多不辨

諭祭少保于謙碑

在三台山墓前謙子兵部郎中冕立見成化杭州府志

宋楊太后書道德經

舊在小麥嶺太清宮刻石幢上見西湖遊覽志

蘇軾等題名

在大麥嶺

蘇軾王瑜楊傑張壽同游天竺過麥嶺

正書字徑三寸文右

行摩崖

邱邠題名

舊在風篁嶺靜菴邱邠賈似道乙未臘月二日來游復亨泰侍後三十一年夏

閏大丞相魏國公賈似道再登揆席少駐湖曲賜第因謁演福來此客廖瑩中陳詩川從子德生侍

見咸淳

臨安志

謹按此段題名今已不見惟賈似道尚存數題一在三生石隸書一在石屋洞一在龍泓洞並正書

似道精於碑刻卽所存摩崖皆大書深刻第其人不足錄耳

秦觀游龍井題名

舊在龍井寺見萬曆杭州府志文見山水

龍井記

舊在龍井寺元豐二年記米芾書鄭清之跋其下見萬曆杭州府志

辨才法師眞贊記

舊在龍井寺元豐元年資政殿學士右諫議大夫知杭州趙抃撰見

成化杭州府志

跋辨才十題

舊在龍井寺元豐二年八月高郵秦觀跋辨才徒懷楚刻石見咸淳臨安志

辨才法師行業記

舊在龍井寺元祐癸酉大中大夫守門下侍郎蘇轍撰見成化杭州

府志

壽聖院訥齋記

舊在龍井寺元祐元年三月朝奉大夫主客郎楊傑撰見成化杭州

府志

蘇軾等題名

舊在龍井

蘇軾錢總江公著柳雍同

謁龍井辨才元祐六年正月七日元祐庚午辨才老師年始八十道俗相慶施于袈裟飯千僧七日而罷眉山蘇軾子瞻洛陽王瑜中玉安陸張璠全翁九江周燾次元來餽

薺茗二月晦日書見咸淳臨安志

方圓菴記

在龍井

杭州龍井山方圓菴記

元豐癸亥四月九日慧

日峰守一記

鹿門居士米元章書 萬曆丁酉

仲夏知仁和縣事晉陵口口跋行

書

神運石題字

在龍井

嶽崑神運石下有玉泓池

草書

南山道人李德遺

五丁神運此石就立在石上

正書

謹按此十字縱橫有法運池二字獨大幾尺餘絕類米書西湖遊覽志止言石上有神運二字非也

葛采詩

在龍井

千年靈洞幾人看
洞裏丹青畫未乾
當是神仙棲止處
石懸龍跡噴陰寒
口巢葛采留題住
山善

慶摩刻

正書
摩崖

林景度等題名

在龍井

林景度韓無咎李秀叔司馬季思崔子霖韓子師

乾道辛卯八月晦自龍井來

正書字徑四寸摩崖

方豪等題名

在象鼻峰

癸酉正月九日思道從惟忠斯清再至見舊題迷

誤復書此

行書摩崖

胡楷聯峰二字

在南山心菴摩崖

董其昌陳繼儒李流芳等題名

在聯峰摩崖

錢武肅王廟碑

在方家峪咸淳臨安志云舊稱錢王太廟錢氏五王皆祠焉前有豐碑螭

首龜趺極高大已經剝蝕細按之實未嘗刻字者

西林法惠院雪齋記

舊在方家峪院中元豐三年四月十五日秦觀撰見成化杭州

府志文
見寺觀

錢鏐慈雲嶺題名

在嶺上

梁單闕之歲興建龍山至湑灘之年開慈雲嶺便
建西關城宇臺殿水閣今勒貞珉用記年月甲申

歲四月十五日吳越國王記

篆書字徑五寸摩崖

謹按此刻凡四十九字分七行行七字卽在嶺路傍陷石壁一方刻其字畫頗完好府縣志稱止十八字及立碑嶺上者誤也
甲申後唐莊宗同光二年

佛法僧三大字

在慈雲嶺

佛法僧

正書字徑三尺

熙寧二年己酉歲中秋日無錫

弟子陳延柏施財刊石

正書
摩崖

雲泉二大字

在慈
雲嶺

雲泉

篆書字
徑一尺

贊曰惟石生雲泉流涓涓上應銀

漢徹於璇源玉陽史際

隸書
摩崖

宋仁宗佛牙贊

在慈雲嶺
石佛院

佛牙贊 仁宗神文聖武明孝皇帝製

正書大字
贊不錄

大宋紹聖改元甲戌歲乙亥月敬刊於杭州慈

雲嶺永壽石佛殿之左

正書

謹按此刻在石佛院殿之左壁摩崖爲之係七律一首咸淳臨安志已辨其僞託詩亦俚鄙今觀其

西漢志 卷二十一
上有舊題額云新建鎮國贊延遐齡石像之記凡
十二字篆書頗精妙此必吳越鑿石佛時所記之
文後爲俗僧磨
改殊可惜也

沖羽書心印銘

在慈雲嶺舊石
龍院傍石壁內

心印銘 唐翰林學士兼太子侍讀史館脩撰守

右補闕梁肅作 浩浩羣生或動或靜或幽或明

旁魄六合運用五行莫不因其心而寓其形波流
火馳出入如機如環無端莫知其歸或細不可視
或大不可圍日月至明或以爲昏秋毫至微或以
爲繁或囊包天地或渴飲四海舒卷變化惟心所

在天壽得喪惟心所宰心遷境遷心廣境廣物無
定心心無定境明則有天人幽則有鬼神苦樂相
紛如絲之棼有無云云不可勝言抑末也已本則
不然惟本之爲體寂兮浩兮不可道兮顯矣默矣
不可測矣統萬有於纖芥視億載於屈指外而不
入內而不出不闔不闢不虛不實無感不應無應
不神在天而天在人而人常存而未始或存常昏
而未嘗或昏豈惟我然蓋無物不然豈惟我得蓋
無物不得混而爲一莫覩其極故曰心生法生心

西漢志 卷二十七
滅法滅離一切相則名諸佛 錢唐講律僧冲羽

書 陶翼并男拱鑄字 天宋皇祐癸巳歲七月

草堂僧慎微糾同志刻於石龍院之崖 正書字徑三寸摩崖

錢倩仲題名

在石龍院心印銘傍

建中靖國元年仲冬會稽錢倩仲游

正書字徑三寸摩崖

石龍淨勝院捨田記

在石龍院傍

淳熙庚子三月十三日住山釋子崇立石正書

記魏氏三八孃捨田事文不錄

建庚申勝會記

在石龍院千佛頭

紹興二十七年立正書文不錄

瑤華洞三大字

在千佛頭

瑤華洞

正書字
徑八寸

皇祐元年己丑九月提點兩浙

缺左
邊

守尚書度支員外郎蘇舜元立石

右邊
摩崖

錢倩仲題名

在瑤
華洞

彭城錢倩仲辛巳仲冬十八日乘興游瑤華洞

小楷

分六行橫
寫摩崖

普澤院仁法師行業贊

舊在龍山院內觀文殿學士
金紫光祿大夫尚書戶部侍

郎孫沔撰見成
化杭州府志

錢鏐郊臺題名

在天眞寺
內靈化洞

梁龍德元年歲次辛巳十一月壬午朔一日天下

西海志 卷二十七
都元帥吳越國王錢鏐置

正書字徑五寸摩崖

林逋蘇軾題名

舊在靈化洞

天真寺小石幢

在寺內吳越時刻文莫辨

宋孝宗玉津園燕射詩光宗和詩

舊在嘉會門外玉津園淳熙元年刻

石見咸淳臨安志

傅大士像塔記

在宋郊壇淨明寺吳越胡進思造晉天福十年二月十一日惠暉記見成

化杭州府志

司馬池等題名

在龍華寺後

司馬池周駿錢聿石再寶陳嘉謨謝景伯馬元康

同游此寺康定元年中秋二十四日元翼題

正書
字徑

三寸
摩崖

蘇軾等題名

在龍華
寺後

蘇軾王瑜楊傑張壽同游龍華元祐五年歲次庚

午三月二日題

正書字徑
四寸摩崖

謹按蘇軾諸題名黨禁時都刻去多出
後人補刻惟此題係原刻故精采倍常

王希呂等題名

在龍華
寺後

淳熙八年閏月甲午駕幸玉津園王希呂韓彥直

閻蒼舒鄭丙□輝王佐施師點趙汝恭孟經葉翥

西漢志 卷二十七
賈選木待問宇文价以扈從至此

正書
摩崖

蕭燧等題名

在龍華
寺後

王淳熙十年三月十八日車駕幸玉津園蕭燧王佐

黃洽曾逮宇文价葛邕王藺張大經詹儀之余端

禮李昌圖趙彥中以扈從至此

正書
摩崖

蕭燧等題名

在龍華
寺後

淳熙丁未季春甲子駕幸玉津園蕭燧韓彥直宇

文价洪邁葛邕蔣繼周韓彥質王信陳居仁李岷

陳賈張森顏師魯劉國瑞胡晉臣扈從至此

正書
摩崖

范成大等題名

在龍華寺後

至能季思壽翁虞卿子宣正甫渭師子餘无咎涪

熙戊戌季春丁巳同游子師不至

正書
摩崖

周必大等題名

在龍華寺後

周子充程泰之劉正甫王仲衡芮國瑞陳敦仁吳
希深木韞之齊子餘以淳熙己亥季春廿有二日

同來

正書
摩崖

京鏗等題名

在龍華寺後

紹熙五年冬至簽書樞密院事豫章京鏗祀上帝

齋宿於寺 慶元改元季秋鐘以知樞密院事再

齋宿於此 二年孟夏雩祀上帝鐘以右丞相充

初獻仍齋宿於此 三年鐘以右丞相充雩祀初

獻齋宿於此 五年四月鐘復齋宿於此仍以右

丞相充初獻 六年春分祀高禩鐘復以右丞相

充初獻齋宿於此 並正書 慶元四年冬至日祀昊

天上帝永嘉許及之以同知樞密院事充初獻

慶元五年九月十二日祀上帝同知樞密院事許

及之充初獻 並隸書

摩崖

何澹等題名

在龍華寺後

慶元二年二月十四日春分祀高禩栝蒼何澹以

同知樞密院事充初獻齋宿於龍華 慶元三年

二月二十六日春分澹以參知政事復充高禩初

獻齋宿 慶元四年九月祀上帝臨海謝深甫以

知樞密院事兼參知政事充初獻齋宿於寺 慶

元五年二月十八日春分禩祀澹以參知政事充

初獻齋宿 慶元六年孟夏望日雩祀上帝深甫

以右丞相充初獻齋宿 五月十六日禱雨祀上

帝深甫充初獻 慶元六年冬至日祀上帝長樂

陳自強以簽書樞密院事充初獻齋宿 嘉泰元

年二月八日春分禘祀澹以知樞密院事兼參知

政事充初獻齋宿 嘉泰元年雩祀上帝深甫充

初獻齋宿 五月十八日禱雨祀上帝深甫充初

獻齋宿 嘉泰二年四月雩祀上帝自強以參知

政事兼知樞密院事充初獻齋宿 嘉泰二年九

月九日同知樞密院事袁說友以季秋祀上帝齋

宿於此 嘉泰癸亥四月壬子簽書樞密院事廣

都費士寅齋宿以雩祀上帝充初獻也 開禧初

元二月二十三日祀高禩廣陵張巖以參知政事

充初獻齋宿龍華寺 開禧初元四月十一日雩

祀上帝吳越錢象祖以參知政事兼同知樞密院

事充初獻齋宿於龍華 開禧元年九月八日祀

上帝自強以右丞相充初獻齋宿 開禧二年孟

夏雩祀上帝自強充初獻齋宿 開禧二年長至

日祀昊天上帝眉山李壁以參知政事充初獻齋

宿龍華 開禧三年正月初四日上辛祈穀自強

充初獻齋宿

並正書
摩崖

袁說友題名

在龍華
寺後

慶元六年八月吏部尙書建安袁說友四以奏告

齋宿於此

隸書
摩崖

潛說友等題名

在龍華
寺後

咸淳七年正月二十二日潛說友徐理同游龍華

正書

摩崖

吳越錢文穆王神道碑

在妙因山
墓道前

大晉故天下兵馬都元帥守尙書令

以下
缺

中書

侍郎同門下平章事和凝撰

行書銘見冢墓

謹按此碑高一丈五尺首行止存十餘字文凡立十行每行九十字前一半石已泐盡後半完好處尚可讀書法絕佳今冢墓所載者從十國春秋錄出止銘也

白居易虛白堂詩

舊在鳳凰山府治刻石立堂上見咸淳臨安志詩見古蹟

雙門記

舊在和寧門內至和二年莆田蔡襄撰見輿地碑記文見古蹟

清暑堂記

舊在鳳凰山府治治平三年莆田蔡襄撰并書又范仲淹記並見成化杭州府志文

見古蹟

戒石銘

舊在鳳凰山府治治平四年郡守祖無擇撰見成化杭州府志

宋高宗玉堂二大字

舊在學士院學士周麟之刻石見咸淳臨安志

宋高宗損齋記

舊在宋南內紹興二十八年十一月出內札以新刻石本損齋記賜羣臣

見建炎以來朝野

雜記文見古蹟

謹按高宗所書論孟諸經俱刻石名曰石刻孝宗啟光堯石經之閣於太學以貯之今遺在杭州府學者雖不全尙有七十餘石每石分四段悉皆正書此損齋記已不傳考志雅堂雜鈔云高宗書損齋二字并損齋記後有左僕射沈該以下題識惜乎不可得見也

紹興米帖

舊在宋南內紹興辛酉高宗集米芾墨蹟刻石禁中見韻石齋筆談

宋孝宗春賦

舊在和寧門北都堂淳熙六年右僕射蔣芾等刻石見中興館閣續錄

淳熙重刻淳化閣帖

舊在宋南內凡十卷卷尾楷書題淳熙十二年修內司恭奉聖

旨摸勒上石
見法帖譜系

慶元黨籍碑

舊在尚書省慶元三年立置籍凡五十九人見中興編年

宋理宗玉堂詩

舊在學士院直院牟子才馬廷鸞等刻石見咸淳臨安志

謹按理宗亦善書其所製古聖十三贊大字正書今在杭州府學字畫頗完好

王羲之墓田丙舍帖

舊在宋南內埋宗刻石見石刻鋪敘

錢鏐排衙石詩刻

在鳳凰山頂

王東南一劍定長鯨
帝匡扶立正聲
輝爭

不仗神明
建瑤壇禮玉京
常熱不會停

恆傳寶藏經
今爲顯真靈
來鎮上

清

正書字徑二寸摩崖

謹按舊志稱排衙石有錢王詩刻今觀所存七言詩八句首行止一王字係當時臣下所刻前有行書數行字差小皆已漫漶僅存仙聖所居必有禳祥之事宮庭旋建聊題七言八句餘多不辨審詩意似爲建郊壇而作也

鳳山二大字

在鳳凰山頂

鳳山

正書字徑七尺

淳熙丁未春洛王大通書

正書摩崖

王大通等題名

在鳳凰山頂

宋人王大通宋黻穆冠卿淳熙丁未春晚同來

正書

宋字徑四寸摩崖

梵天寺經幢

在寺門

大佛頂陀羅尼經

在幢內三幅字已漫漶

大隨求卽得大

自在陀羅尼神咒經

右幢經不錄並正書

建幢記竊以奉

空王之大教尊阿育之靈蹤崇雁塔於九層衛鴻
圖於萬祀梵刹旣當於圓就寶幢是鎮於方隅遂
命選以工人鑿於巨石琢鞭來之堅固狀涌出之
規儀玉削霜標花雕八面勒佛頂隨求之加句爲
塵籠沙界之良因所願家國恆康封疆永肅祖世
俱乘於多福宗親常沐於慈恩職掌官寮中外寧
吉仍將福祉徧及幽明凡在有情希沾妙善 乾

德三年乙丑歲六月庚子朔十五甲寅日立天

下大元帥吳越國王錢俶建

並行書

靈鰓井記

舊在梵天寺僧錄贊寧撰刻塔石上見咸淳臨安志

觀音泉銘

舊在羅漢洞嘉泰元年立石見咸淳臨安志

勝果二大字

在勝果寺殿後立石碱下

勝果

隸書字徑三尺

皇宋淳熙十三年夏四月甲子重

建

正書

忠實二大字

在勝果寺後字徑五尺橫寫摩崖

正書

謹按此書無題款成化杭州府志云勝果寺有宋高宗書忠實亭石刻在鳳凰山之右或卽此書也

躍雲二字

在勝果寺後
隸書字徑八寸摩崖

鳳山靈應廟記

舊在廟中洪武中杭州府儒學教授徐一夔撰見成化杭州府志

石刻諸經

在崇聖寺中

佛說阿彌陀經黃輝書

正書有跋

般若波羅密多心

經嚴大紀書

正書

佛說四十二章經李流芳書

正書

佛遺教經嚴調御書

正書

金剛經嚴調御書

正書

浴像功德經嚴調御書

正書有跋

金剛經董其昌

書

分三十
二體

梵行品沈鼎新書

正書

七佛偈嚴調

御書

正書

信心銘嚴武順書

正書

證道歌陸賁思

書正書 瀉山警策俞時篤書正書

昭貺神廟記在三郎廟下

鄉貢進士戰惟肅撰金華吳肅書吳興趙弈篆至

正二十五年七月日錢塘縣尹仇有進立石正書文見

祠字

佛頂尊勝陀羅經在江干閘口磚塔宋刻無紀年書人

大佛頂陀羅尼經在江干石塔宋刻無紀年書人

歐陽脩秋聲賦歸雁亭詩舊在六和寺傍真聖觀內見咸淳臨安志

六和塔尙書省牒碑在塔內

尙書省牒

大字
行書

牒文

小字正書
文不錄

牒奉敕宜賜

開化寺爲額牒至准敕故牒

大字
行書

少保尙書左

僕射同中書門下平章事簽書樞密院事兼權參

知政事錢

押

同簽書樞密院兼權參知政事虞

押並大
字扁寫

隆興二年十二月日牒

大字尙
書省印

付僧

智曇劄

押臨安府印小
字正書文不錄

付開化寺劄

小字正書
文不錄

乾道元年七月日

押臨安
府印

乾道元年八月日

押臨安
府印

修六和塔磚記

在塔內磚刻字陽文首題
大宋國末書辛巳四月

觀世音經像碑

在六和塔

佛說觀世音經

前有大士圓光小像經文小楷細書袖珍本經不錄

已定

居士董仲永向施小字觀音經後以湮沒遂成中

輟今復命工刻經於石用廣其施又求得菩薩妙

相李伯時墨本同刻諸石作無盡施仲永稽首合

掌說偈

贊不錄

時紹興二年歲次壬子中元日記

小楷此段在經文之前上亦有大士趺坐像

金剛般若波羅密經

在六和塔

金剛般若波羅密經

依經文分三十二段經不錄正行書各體不著名

昔熙寧盛時賈文元公與名德耆舊三十有二人
爲僧智利悟朋其書金剛經一卷今朝廷莫安四
方無虞六和塔主僧智曇請於親貴鉅公接踵前

規合同寫此

跋隸書
以下缺

佛說四十二章經

在六和塔

特進尙書左僕射同中書門下平章事吳興郡開

國公沈該

第一

左正奉大夫守尙書右僕射同

中書門下平章事縉雲郡開國公湯思退

第二

左中大夫知樞密院事陳誠之

第三

左中大夫

參知政事陳康伯

第四段

左太中大夫同知樞密

院事王綸

第五段

左太中大夫權吏部尙書賀允

中

第六段
行書

左朝請郎試尙書吏部侍郎兼史館

脩撰兼侍講葉義問

第七段

左朝請大夫試尙書

兵部侍郎兼侍講兼直學士院楊椿

第八段

左朝

散郎試給事中兼直學士院兼同修國史周麟之

第九段

左朝散郎試中書舍人兼權樞密都承旨

洪遵

第十段

左朝散大夫充敷文閣待制提舉佑

神觀楊傑

第十一段

左朝奉大夫權尙書吏部侍郎

沈介第十段

左中奉大夫權尙書戶部侍郎趙令

諤第十段

左朝奉大夫權尙書禮部侍郎兼侍講

孫道夫第十段

左朝請郎權尙書工部侍郎王

晞亮第十段

左朝請郎權尙書刑部侍郎兼權詳

定一司敕令黃祖舜第十段

左宣教郎試起居舍

人兼權中書舍人張孝祥第十段

左朝請大夫太

常少卿兼權中書門下省檢正諸房公事宋棐第十段

八段

左朝奉大夫守宗正少卿金安節第十段

八段

右

朝請郎守大理少卿李洪第十段

右朝議大夫司

農少卿董萃

第二段

右中大夫行太府少卿錢

端禮

第二段
段行書

左朝奉大夫將作監張宗元

第二

十三

左朝請大夫軍器監張運

第二段
段行書

左

朝請大夫尙書吏部郎中楊朴

第二段
段行書

右朝

奉郎守尙書戶部郎中兼權金部郎中莫濛

第二

段右奉直大夫尙書刑部郎中路彬

第二十七
段行書

左朝散郎守尙書工部郎中張廷實

第二十
八段

左奉議郎守尙書吏部員外郎兼權尙書右司郎

官周操

第二十九
段行書

左朝奉郎尙書吏部員外郎

兼國史院編脩官兼權樞密院檢詳諸房文字葉

謙亨

第三十段行書

左朝奉郎尙書吏部員外郎兼國

史院編修官胡沆

第三十一段行書

右朝散郎尙書司

勳員外郎陳俊卿

第三十二段

右宣教郎守尙書司

封員外郎鮑彪

第三十三段

左朝請郎尙書考功員

外郎陳棠

第三十四段

左朝散郎尙書禮部員外郎

楊邦弼

第三十五段

左朝奉郎尙書祠部員外郎兼

權國子司業張洙

第三十六段

右承議郎尙書刑部

員外郎黃子淳

第三十七段行書

左朝請郎尙書都官

西湖志卷之二十七

總校董紹舒分校

王彥起
張景雲校